

SAN PABLO KARTA ROMA ÇXHABTEWE'SX JÏI

Romatewe'stxxi Pablo weçxana fxi'jni

¹ Adxa' Jesukristo's selpisáa Pablo yaaseth. Aça' adxa's Dxusku txhitçxa nvxiht, Kristo yuwe ewte nvxiitwa'jsa's pta'sxkahn.

² Dxusa' txãa yuwe ewte nvxiitwa'jsa's pta'sxni yuuna jïna kfxi'ja'kh nyafxíi entey Dxusna selpisaawe'stxxi. ³ Aça' txãa Dxus yuwe ewte nvxiitwa'jsa' kwe'stxxi jxpe'jsa Jesukristo Dxus Nçxi'ka'sku we'we'. Aça' Jesukristo' naa kiwete yu' jxkaahsa Davxid ji'thek upx kakwe yu'. ⁴ Nawa kïhtewa jxuka ãjawa'jsa Dxus Nçxi'ktewa Dxus Espiritu' kwe'stxxi kaajiyu'kh Jesukristo's uuniijũ itxi vxitçxa. ⁵ Sa' adxa's peeygãhçxa Jesukristo nwe'wete', Dxus txhitxnisath yuu, Jesukristo's selpiwa'jsa, kxah naa kiwete maa nasawa Jesukristo's jiyuçxa jxpa'gatxna txã'sna nwëese'jya'. ⁶ Aça' i'kwe'sxwa Jesukristo's jiyuçxa ne'kwe jxpa'ga, Dxusa' petx i'kwe'sxne' txhitxh Jesukristo tasxte pa'jwa'jsa txãa pa'ga nwëese'jna üsi'kwe.

⁷ Açxha' Roma çxhabtewe'sx i'kwe'sx jxukaysa jïi naa karta's fxi'jçxa kajaçthu, i'kwe'sxa' Dxus peeygãhçxa txhitxnisai'kwe txãa yakh fxi'zesa. I'kwe'stxxi' Dxusa' pu'çxhina vxite' kwe'stxxi jxpe'jsa Jesukristo, txãa pa'ga Dxus yakhçxáa mfxi'zewe.

Roma çxhabna Pablo u'j wēeni

⁸ Jesukristo i'kwe'sxtxi pu'çxpa'ga Dxus yakh i'kwe'sx ew fxi'zeni's mteewa jxukatx ew we'we', txãa pa'ga adxa' Dxusa'sthi weçxá'. ⁹ Sa' na'wē Dxusa's nakwe wala selpi'th txajx Nçxi'k kaapiya'jni's ũsuh jxuka yajkxna txãa Dxusa' jiia' adxa' i'kwe'sx pa'gate bagaçxtewa txãa yakh puutx we'wena nes yuusaatewa. ¹⁰ Txãasath i'kwe'sx tasxna yuhwaça' sũhçxa Dxus yakh puutx we'wena nes yu'. ¹¹ Sa' kxtee pa'jçxa' Dxus yakh fxi'zewa'ja's i'kwe'sxtxi pu'çxhi'nja sũju'th, jweeíçxáa çxhãçxha fxi'zekahn. ¹² Sa' puutx kxteeçxah ya'pu'çxna Dxus yakh çxhãçxha fxi'zewa'ja's ji'phu'nja'w, txãa pa'gatey i'kwe'sxwa Dxusa's yaakxsa i'kwe adx na'wēy.

¹³ Yakhtē'jwe'sxtxi pta'sxi'th: i'kwe'sx yakh puutx uyya' yuwe'nja sũhna maz uswa yajkçxawa, açxpkaçx yujxa' yu' tudunimeeth. I'kwe'sx ksxavxysu Dxus luuçx yuuwa'jsa ũstxna txãatx Dxus jii knayya' yuwe'nja sũju'th, ma'wētká vxite kiwesuwa Dxus jii knay txã'wēy.

¹⁴ Adxa' maa nasatxwa jxuka Kristo yuwe's pta'sxwa'j ji'pthu, çxhabtewe'sx ma'tx yuu, fxiy we'wesa ma'tx yuu, naa kiwete wala jiisa ma'tx yuu meeçxa' jiimeesa ma'tx yuu nawa ma'wēsátxwa jxuka pta'sxwa'j ji'pthu. ¹⁵ Txãasa adxa' Kristo yuwe ewte nvxiitwa'jsa's pta'sxya' yuwe'nja sũhnaçxáa ũsthu Roma çxhabte i'kwe'sxtxiwa.

Kristo' maatxwa jxuka nwe'wewa'jsa'

¹⁶ Adxa' Kristo yuwe ewte nvxiitwa'jsa's pta'sxya' weh yuhwa thaame'çmeeth, txãa

pa'gatey Kristo' Dxus kaahnisa' maatxwa nwe'weya' ājawa'jsa txã'sna ũuste jxpa'gasa yuutxi', judiu ma'tx yuu judiimeesa ma'tx yuu nawa maa nasatxwa jxuka nwe'wewa'jsa'.
 17 Aça' nwe'wenisa yuuya', Kristo's ũusuh jxuka yajkçxa jxpa'gate yuuçxáak Dxus dxi'pte yuuwemée ewsa yuuna ya'pa'ja'. Txã'wē yuuwa'ja's Dxus librute vxite ajkhēwa na'jīnak pta'sxi': Dxusa's ũusuh jxuka yajkxte yuuçxáa Dxus yakh fxi'zewa'ja's ya'ji'phuna jī'k.

Naa kiwete nasa' yuuwesata'

18 Dxus kastigo seena'sa cieluju yuja' nasa ewmeesa jxukaysawe'sx jīi, txāawe'sxa' ewmeete yuuçxáa fxi'zena isasa yu'sa' yupna ũsta' naa pa'ga. 19-20 Txāa ente' Dxus ma'wēsatewa jīimeetha'w yu' jīya' ājameetxna, txāa pa'gatey Dxus ma'wēsatewa kaajiyu'jsa ũsta' Dxus pheu'jçxa nvxiitnisa txāatx kaajiyu'ju'. Txāa pa'gak naa kiwe's pheu'jçxa nvxiitnijū' ew ya'jiyu' Dxusa' kīhtewa jxuka ājawa'jsa bagaçxtewa nes yuuwa'jsatewa. Aça' txāa ma'wēsaçxawa kaajiyu'jnku txã'wē pheu'jçxa nvxiht. 21 Txã'wē Dxusa' ũsyuhna sūhwa'j yu'sa' ji'phuçxawa, isate yu' Dxusa's weçxana nwēese'jmée, naa kiwete kīh yuhwa seelpimeesaçxá'stxi pakwena jxã'j. Aça' txã'wē yūupa'ga txāawe'sx ũusa' naa kiwete ewmeesa yuuçxá'sku yaakxwa'jsa neeyūu. 22 Txāawe'sx yu' jiitha'w jī'tx, nawa jīimeesatx yuuna pa'j. 23 Txã'wē Dxus bagaçxte yuhwa pçuwa'jsamée kīhtewa jxuka ājawa'jsa' txã'sna neewe'wepkaçxte, naa kiwete pçuwa'jsa

nasa na'wě piisaçxatx neewe'wena ũsu'. Sa' txã'wěçxáa yũumée, fxuusá, yu'kh eçx txã'wěsa na'wě vxitçxatx neewe'wena ũsu'.

²⁴ Txã'wě yũupa'ga Dxusa' txãawe'sxtxi' pu'çxmée nvxihtku, peekx ewmée kazx yaakxniçxá's kxtey yuuna fxi'zekahn, kxahtx kīhwa thaampa'saçxá's puutx ya'ewmée yũuna fxi'ze' teeçxsa na'wěçxah. ²⁵ Txãawe'sxa' isa Dxus itxisa yu'sa' jxpa'gaya' wa'lçxa, Dxusmeeçxá'stxi jxpa'ga. Txãasatx wejxwa Dxus kīhnawa jxuka pheu'jçxa nvxiit-sa'síi neewe'wepkaçxte, naa kiwete Dxus pheu'jçxa nvxiitnisaçxá'stxi neewe'wena fxi'ze'. Txã'wě Dxus bagaçxtewa pçuwa'jmeesa's neewe'wewaç, wejx thaakwe ewsa', nawa txã'wě yũumeeta'.

²⁶ Txãa pa'ga Dxusa' pu'çxmée nvxihtku, txãawe'sx ewmée kazx yaakxniçxá's kxtey yuuna fxi'zekahn. Aça' u'y pwe'sxtxi pkal yuuna fxi'ze', txãawe'sx kakwe'síiçxáa suwwa'jsana pakwena. ²⁷ Txã'wěy piçthē'jwe'sxwa nyu yakh zhiçxkwe fxi'zeni yu'sa' nvxihtçxa, puutx piçthē'j pwe'sxtxi pkal thaampa'saçxá's kxtey yuuna fxi'ze', peekx kakwe kazx yaakxniçxá's nwēese'jna. Txã'wě yũuçxa peekx kakwe'jçxáa ya'kastigāywa'ja's uyu'tx.

²⁸ Txã'wě Dxusa's nwēese'jya' wa'lyā'the', Dxusa' pu'çxmée nvxihtku, txãawe'sx kazx yaakxniçxá's nwēese'jçxa peekx ma'wēwa ewmée yũuna fxi'zekahn. ²⁹ Txãa pa'gatx ewmeesa yuuçxáa yuuna pa'j: pthāawesa, pkal yuunisa, ewsa's jiiçxawa ewmeeçxáa

yūusáa, Dxus yu's yajkxmée ji'phu wēniçxá's yaakxsa, kīhwa ewmeeçxáa yūusáa, vxitetx açeyaakxsa, nasa ikhsa, puii kiissa, ĩsxiisa, ewsa yu'sa' weeçxsa, ĩsxiiçxa kaapui'jsa, txā'wēçxáa yūusaata'. ³⁰ Vxitetx ewmée nuywe'wesa, Dxusna açesa, puutx ya'wēesxusá, peekíçxáa iiwejçx yaakxsa, vxitee dxi'pte iiwejçx we'wesa, ewmée yūuwa'j u'sesa pakwena fxi'zesa, neywe'sxtxi nwēese'jsamée, ³¹ ewsa's jiyuya' wa'lsa, puutx we'weni's kxtey yuusamée, kim yuhnawa peeygāasamée, bagaçxte yuhwa yuwe ewuusamée, kim yuhnawa pu'çxsamée. ³² Txāawe'sxa' wala ew jiita' txā'wē ewmée yūupa'ga Dxus kastigote uuwa'ja's. Txā'wē ew jiiçxawa, ewmeesa yuuçxáanatx kxtey yuuna fxi'ze'. Sa' ũus yuhwa ji'phmeesa yā'tha', txāsatx vxitesa ewmée yūuçte uyçxa', wejxwa kçxhāaçxha'jna fxi'ze'.

2

Dxusa' isak kastigaĩ

¹ Txā'wē ewmée yūupa'ga Dxus kastigo's jxpa'gawa'j ji'phta' jīna idxa' açewe'weçxawa, txāa nasa ewmeesa na'wē íçxáag ewmée yūuna fxi'ze' makwe Dxusa's jiiçxawa. ² Peekx jiitha'w txā'wē ewmée yūusatxi's Dxusa' isak kastigaĩ maatxwa jxuka. ³ Aça' idxa' txā'wē vxitetx açewe'wena Dxus kastigo's jxpa'gawa'j ji'phta' jiiçxawa idxwa txā'wēyçxáa ewmée yūuçxa', Dxusa' idxa's kastigaĩmeena ¿sūju'gá'? ⁴ Txā'wē ewmée yūutewa Dxusa' peeygāhçxa āçxhíi yu' kastigaĩmée ũsa'. Nawa txāa yu' idx ewmée

yūunitx nvxihtçxa txajx tasxte sxawedkahn ũythasna iipe'ja'. ⁵ Txã'wẽ ũythasna ũstewa, iidx ewmée yūunitx nvxihtçxa Dxus tasxte sxawedwa'j yu'sa' yaaki'çmeeg. Txãa pa'ga ya'kastigãywa'ja's jweeiiçxáa nuywalana ũsgu, nmeh ente Dxus kastigãywa'j en âhtewe'sx. ⁶ Txãa ente' ma'wẽ yūusaçxawa, teeçxa na'wẽçxah jxpa'gatxna txãawe'sx jĩ's: ⁷ bagaçxte yuhwa pçuwa'jsame's een isa pakwena ewçxáa yūuna fxi'zesa' pçumée itxi fxi'zewa'ja's jxpa'gatxna. ⁸ Naapkaçxha' Dxusa's ahçena txajx jxkaahni yu'sa' kxtey yuumée ewmeeçxáa yūuna fxi'zesa' Dxus kastigo seena' yuhsa's jxpa'gatxna. ⁹ Maawa ewmeeçxáa yūusa yuutxi's jxuka kastigãywa'j en pa'jana, judiu ji'jmée vxite nasatx yuhwa kastigãyçxa', judiuwe'sx yuutxi' wejx txã'wẽ kastigaĩna. ¹⁰ Nawa maawa ew yūuna fxi'zesatxi's Dxusa' ũsuna txãa yakh wêt weçxana fxi'zewa'ja's, judiuwe'sxtxi ũsçxa', judiu ji'jmée vxite nasatxwa txã'wẽyçxáa ũsuna. ¹¹ Txãa pa'gatey Dxusa' teeçxaçxáan jxthaakwe ew jxpe'je'çme', jxukaytxi txãa na'wẽçxaçxáak jxpe'je'.

¹² Moises leya's jiimeesawa ewmée yūuna fxi'zesa yu' jxukaysa vxituwa'jsa iíçxáata'. Aça' makwe Moises leya's jiiçxawa ewmée yūuna fxi'zesa yu' txãawe'sxwa jxukaysa vxituwa'jsa iíçxáata', txãa leya's nwéese'jmeeçxa ewmée yūupa'ga. ¹³ Txãa pa'gatey leya's jiipa'gaçxáa ewte ya'neeyũ'çme', aça' makwe leya's jiimeeçxawa ley jxkaahnitx kaavxya'ja'jsa yuuçxáa yuuwemée yuuwa'jsata'. ¹⁴ Aça' judiu

ji'jmée vxite nasa makwe leya's jiimeeçxawa ley jxkaahni Dxus kaaũusuthe'jni's kaavxya'ja'jtx ewmeesa yuutxi' nwēese'jméeh ewsaçxá's kxtey yuuna. ¹⁵ Txã'wē yũuwa'ja's Dxusne' kaaũusuthe'je', txãa pa'gatx äate kaavxya'ja'jna ewçxáa fxi'ze'. Txã'wē yũuwa'ja's txãawe'sx ũus yaakxni' kaajiyu'ju'ne' kīh yũuni ewmeesatewa sa' kīh yũuni ewsatewa txã'wēy. ¹⁶ Aça' Dxus kaahni Jesukristo kīhçxa', nasaa ũusteçxáa yaakxni's jxuka äate kaajiyu'juna txã'wē yũuwa'ja'sthu adxa' pta'sxi'.

Judiuwe'sx Moises leya's ji'phsa

¹⁷ Nawa idxa' na'jĩ'g: judiuth, txãasa Moises leya's ji'ptha'w. Txãa pa'ga Dxusa's jiisath jĩçxa iiwejçxgu yaaki'. ¹⁸ Dxus jxkaahni's jiisag, Dxus leya' kaapiya'ja'k ewsaçxá's txhitxwa'ja's. ¹⁹ Yafx ji'phmeesatx jxpe'jsath jĩ'g, sa' çxhi'dxte fxi'zesatxwa eena'te kutxi'jsath jĩ'g. ²⁰ Sa' ley ji'ptha'w kxteea' ma'wē fxi'zewa'ja'swa pta'sxi'k ewsaçxáana kxtey yuuwa'ja's jĩ'g.

Txãasag ma'wē fxi'zewa'ja'swa kaajiyu'jsath jĩ'. Sa' pxthaakwesatxwa pta'sxsath, txã'wē yuuya' íçxáa leya's ji'ptha'w jĩ'g. ²¹ Txã'wē vxitetx kaapiya'jaççxa', idx yu' ¿kīh yũuçxaga piya'çmée? Idxíiwa pta'sxçxa': Pesweewa'jme' jĩ'g sa' idx yu' ¿kījxa'ga peswé'? ²² Idxii we'weçxawa: Ptamsayã'ja' vxitesa yakh pkal yuuwa'jme' jĩ'g sa' ¿kīh yũuçxaga idx yu' kxtey yu'çmée? Idxíiwa Dxus ïtximeesatxi's açe'g sa' ¿kījxa'ga Dxus ïtximeesatx peswé'? ²³ Dxus leya's ji'ptha'w sũhna iiwejçxgu yaaki', nawa txãa ley jxkaahni's jxuka nwēese'jmeeçxa',

Dxusa's açesag. ²⁴ Aça' Dxus librute' isa yuh we'we'k na'jina: judiu ji'jmée vxite nasa' Dxusa's açewe'we'tx, nawa yuuwesa yu' i'kwe'sxi'kwe ji'k.

²⁵ ãçxha' na'wě yũunisa's pta'sxya'wath: Moises leya's nwěese'jna kaavxya'ja'ja'ççxa yu', cirkuncidãyni's jxpa'gawa'j yuja'. Nawa ley jxkaahnitx jxuka kaavxya'ja'ja'çmeeçxa ya'cirkuncidãyte', cirkuncidãynimeesanpa iïçxá'. ²⁶ Aça' cirkuncidãynimeesaçxawa leya's jiisa na'wě ew yũuwa'ja's kxtey yuute yu', cirkuncidãyni na'wěysa iïçxá'. ²⁷ Mpa'yajkxwe. Txã'wěme' cirkuncidãynimeesaçxawa, ley jxkaahnitx kaavxya'ja'jsa yu' cirkuncidãynisawe'sxtxi ewmeekhě nvxiitutxna, makwe leya's ji'phçxawa jxkaahni's jxuka kaavxya'ja'ja'çmeeçxa ya'cirkuncidãyte'. ²⁸ Txã'wě yuwejuçxáa judiuth jisa judiu ya'yu'çme', sa' txã'wěy kakweteçxáa cirkuncidãyçxa judiu ya'yu'çme', ²⁹ naasáa ũusuh jxuka Dxusa's yajkxna ew fxi'zeteçxáak judiu na'wě yuh yuuna ya'pa'ja'. Sa' ewmée ũus yaakxni's yu'pthehnisaxáa cirkuncidãyni na'wě. Aça' txã'wě ewmée ũus yaakxni's yu'pthehsa yuuçxá'sku Dxusa' weçxá'.

3

¹ Txã'wěte', judiuçxáa çkĩh wejx thaakwe ewsa ji'phtxna? Sa' ya'cirkuncidãyni' çkĩhtega selpi'? ² Txãawe'sxa' ewsa yu'sa' wala ji'phta'. Txãasaii kĩhtewa thaakwe ewsa Dxus yuwe's ji'phta' txãawe'sxtxi neewe'weçxa nvxiitnisa's. ³ Txã'wě Dxus yuwe thaakwe ewsa's ji'phçxawa

judiuwe'sx maaii yu' Dxus yakh fxi'zewa'ja's kxtey yuumeete', ¿kĩh yuukx? ¿Txã'wẽ kxtey yuumeeteçxáa ¿Dxuswa kĩhtewa jxuka pu'çxya' puutx we'weni's pu'çxmée yuuma'k? ⁴ Txã'wẽ yuumeena. Makwe naa kiwete nasa' Dxus yakh fxi'zewa'ja's kxtey yuumeetewa, Dxus yu' txajx pu'çxya' puutx we'weni's kxtey yuuna. Dxus txã'wẽ kxtey yũuwa'ja's we'weçxa', Dxus librute na'jĩ'k:

Txãa ente kxtey yuuni's uyçxa',

İsxiimée isa yuh we'wesa yu'ga jĩtxna jĩ'k.

⁵ Kwe'sx ewmée yũunisa' selpi'k txã'wẽ ewmée yũute iıçxáak Dxusa' txajx peeygãani's jweeiıçxáa áate kaavxya'ja'ja'. Txãa pa'ga ewmée yũunisa' seelpisa', Dxus peeygãani's kaavxya'ja'jsa jĩ'tx maaii yu'. Txã'wẽte', kwe'sx ewmée yũuni's ¿ma'jĩtka'w? Kwe'sx ewmée yũunisa' seelpisate', Dxusa' ewmée yũusatxi's kastigãyçxa', ¿Dxuswa ewmée yũusaçxa ma'k txã'wẽ yũu? ⁶ Weh yuhwa ewmée yũusame'. Dxusa' ¿ma'wẽ naa kiwete nasa yuuwesatx kastigãyya' ájakx, txãaiıwa ewmée yũusaçxá'?

⁷ Txã'wẽ adx ewmée yũunisa Dxusa's kxtey kxu'ju'jna selpiiçte', ¿adxa's kĩjxa'çxáa ewmeeg yũu jĩna we'weçxa kastigaĩkx? ⁸ Txã'wẽ yaakxsa': Ewmeesaçxá's wejx pa'pçxute ewna, ewsa vxyaana nes yuukahn jĩ'tx. Txãa yu' adxa's açesatx txã'jĩ': Pablo' txã'wẽk kaapiya'ja' jĩna. Txã'wẽ we'wesa' Dxus kastigo yuuçxá's jxpa'gawa'jsata'.

Jxukay yuuwesatha'w

⁹ Na'wē' aça' çjudiuwe'sxçxáa kīh yūuçxa vxite nasate jxthaakwe ewsa yuukxtha'w? Weh yuhwa thaakwe ewsameetha'w. Txã'wē judiuwe'sxçxáa thaakwe ewsatha'w sūhwe'sxte kaajiyu'juçthu: judiu ma'k yuu vxite nasa ma'k yuu nawa jxukaysa ewmée pkalsaçxaçxáatha'w.

¹⁰ Txajjik Dxus librutewa na'wē we'we':

Teeçxçxáa yuhwa ewsa yu' meeta'.

¹¹ Kim yuhwa Dxusa's jiyuçxa pakweya' yaakxsameeta'.

¹² Jxukaysa jxpubaçxa vxituni ũsta'.

Txãasa ew yūuwa'j yu'sa' teeçxçxáa yuhwa yaaki'çmeeta' mteewe'sxçxáa yuhwa.

¹³ Txãawe'sx we'weni' uusáa pedani kafxa's phadeni na'wē kazxsata'.

Sa' txãawe'sx thune' ul weeswée weneno na'wē ikhsa', ĩsxiina kaypuba'jçxa.

¹⁴ Seena' kazx ewmée we'weni' yuuçxá's ji'phta'.

¹⁵ Txãawe'sx çxida' nasa ikhya' u'jwa'ja's yuuçxáatx selpi'.

¹⁶ Vxitetx nxuste kaafxi'ze'jwa'ja's yuuçxáatx yajkxna fxi'ze'.

¹⁷ Ewte kaafxi'ze'jwa'j yu'sa' yaaki'çmeeta'.

¹⁸ Dxusa' uyna ũsna sūhna ũukhwa'ja's yu' ji'phmeeta' jī'k.

¹⁹ Dxus librute na'wē ewmeesata' jīna we'we'k txãa yu' Dxus leya's jīsawe'sxtxi we'weçxak txã'jī'. Aça' txãawe'sxa' Dxus yakh pdxi'puwa'j en āhte', yuuwemeesatha'w jīna pasya' ājameetxna kim yuhwa. ²⁰ Txãa pa'gatey leya'sçxáa yajkxte', maa yuhwa yuuwemée ewsa ya'yu'çme', leya' naasáa kīh txã'wē ewmeetewa txã'sna pta'sxsaxá' naa pa'ga.

Yuuwemeesa yuuya' Kristo's jxpa'gawa'ja'

²¹ Aça' ley jxkaahni's nvxihtçxa yuuwemée ewsa yuuna pa'jwa'ja's açxha' Dxusíi kaajiyu'kh, txã'wě yūuwa'ja's Dxus leyte txāniiteyku pta'sxna fxi'jni ūsu' Dxusna selpisaawe'sx fxi'jni.

²² Txã'wě yuuwemée ewsa yuuna pa'jya', naasáa Jesukristo yuuçxá's ūsuh jxuka yaakxwa'ja', nasa ma'wēsawa jxuka. ²³ Txã'wěme' maa yuhwa ewsamée, jxukay pkalsaçxaçxáa yuuna pa'jçxa Dxus tasxte pa'jwa'ja's ji'phmée ūsta'.

²⁴ Txāa pa'gak Dxusa' peeygāhçxa txajx tasxte yuuwemée ewsa yuuna pa'khan, Kristo Jesusa's uuwa'j vxit kwe'sx yuuwesatx nwe'wekahn.

²⁵ Aça' Kristo txã'wě kluuste uuniijūk Dxusa's yaakxsa txāniiteywe'sx pkal peltunānimée ūsu'ne'ta txāa pkaltxi Dxusa' peltunāy, aça' txajūtx yuuwemeesa jīni yuu. ²⁶ Sa' naa ensuwe'sx pkaltxiwa txã'wěyçxáak Dxusa' txagaçxhíi Kristo kluuste uuniijūjx peltunāyçxa nvxiht, yuuwemeesa yuukahn maawa Kristo's jxpa'gawa'jsa yuutxi'.

²⁷ Aça' ¿kīh yuupa'ga kwe'sxçxáa ewsatha'w sūhna weeçx yaakikxtha'w? Txã'wě yaakxwa'ja' pçuk. ¿Kīh yuupa'gaga iiwejçx yaakxwa'ja' pçu? Jesusa's ūsuh jxuka yajkxçxa jxpa'ganisa yakha', iiwejçx yaakxwa'j kaseje'çme', txāa pa'gak iiwejçx yaakxwa'ja' pçu. Txã'wěme' nyafxíi yu' ley jxkaahnitx kxteythu yu' sūhte', iiwejçx yaakxwa'jçxáak kaseje'. ²⁸ Txāa pa'ga jiitha'w ley jxkaahni's nvxihtçxa, naasáa Kristo yuuçxá's ūsuh jxuka yajkxçxa jxpa'gateçxáa, yuuwemée ewsa yuuna ya'pa'ja'k nasa

ma'wēsawa jxuka.

²⁹ Dxusa' judiuwe'sxçxáatx pu'çxçxa', judiu jii'mée vxite nasa yuutxi' pu'çxwa'jsamée wáana açne'kwe i'kwe'sxçxáa iiwejçx yaaki'. Txã'wē yuumée judiu jii'mée vxite nasatxwa pu'çxwa'jsaíçxá'. ³⁰ Teeçx Dxusçxáa jxukaysawe'sxtxi pu'çxwa'jsa', cirkuncidāynisaçxawa Jesusna ũusuh jxuka yajxna jxpa'gateçxáa yuuwemeesa ya'yuuna. Sa' txã'wēy cirkuncidāynimeesaçxawa Jesusna ũusuh jxuka yajxna jxpa'gateçxáa yuuwemée ewsa ya'yuuna. ³¹ Txã'wē Jesusna ũuste jxpa'gawa'jçxá's pta'sxçxa', ley yu' pu'çxwa'jsame' jĩçxa txã'jĩ'çmeetha'w, wejxwa ley jxkaahni's kxtey yuua'ja'stha'w pta'sxi'.

4

Abrahana' na'wēk yuu

¹ Kwe'sx yaçgawe'sx Abrahana's ũus miiyajxwe wakx: Txã' ¿kĩhga yūu yuuwemeesa yuuna pa'jya'? ² Abrahana' kĩhçxáawa yūuçxa txã'wē yuuwemée ewsa yuuna pa'jwaça', txã'wē yūuçxath ewsa yuuna pa'j sūhna iiwejçx yaakxwa'ja's jii'phuwa'j ne' yu'. Nawa kĩhwa yūumeeçxak ewsa yuuna pa'j, naa pa'ga iiwejçx yaakxwa'j jii'phmeek yu'. ³ Txajíik Dxus librute pta'sxçxa': Abrahana' ũusuh yuuçxáak Dxusa' kxtey yuuna sūhna yajxk. Txã'wē yaakxpa'gaçxáa ewsa yuuk jii'k. ⁴ Peekx jii i'kwe: Kĩhçxáawa mjíipa'ga dukhnisa' peenisame'; txã' mjíipa'ga dukhnisa', yuula's dewenisa'. ⁵ Nawa kĩh yuhwa yūumeeçxawa, naasáa

pkalsatx nwe'wesa Dxusa's yuuçxáa ũusuh jxuka yajkxteçxáa, Dxusa' txã'sa' yuuwemeesak vxitu'.
 6 Txajíik kíh yuhwa yũumeeçxawa yuuwemeesa yuuçxa weçxana fxi'zewa'ja's Davxida' we'we na'jína:

7 Yuuwemeesag jína Dxusa' we'wete',

Yuuwemée neeyũusaawe'sxa' weçxanatx fxi'ze'.

8 Maanawa txãawe'sx pkaltxi khūkhte',
 weçxana fxi'zetxna jĩ'k.

9 Na'wě weçxana fxi'zewa'ja's pta'sxi'k txã' ¿cirkuncidāynisawe'sx jĩçxáa wáana, meeçxa' cirkuncidāynimeesawe'sx jĩi yã'jçxa wáanakx? ¿Maa sũju'kwe? Ew jiyuya' Abrahana's miijajkxwe. Txã' ũusuh yuuçxáa Dxusa's yaakxpa'ga yuuçxáak yuuwemée yuuna pa'j jĩ'k. 10 Aça' Abrahana' ¿bagaçxga txã'wě ewsa yuuna pa'j? ¿Cirkuncidāynijũ', meeçxa' cirkuncidāynimey wá' yuuwemée ewsa yuuna pa'j? Ew jĩitha'w cirkuncidāyni yuumeyku yuuwemée ewsa yuuna pa'j. Txãa e'suk Abrahana' cirkuncidāyni yuu. 11 Nawa txãa cirkuncision yu' naasáa Dxusa's ũusuh jxuka yaakxpa'ga yuuçxáa yuuwemeesak yuu jína kakwete snxal ki'pnisaçxá'. Txãa pa'gak Abrahana' tata na'wě kaseje', makwe cirkuncidāynimeesaçxawa Dxusa's ũusuh jxuka yaakxsawe'sx maawa jxukaysatx. Aça' maawa Abraham na'wěy cirkuncidāynimeesaçxawa ũusuh jxuka yaakxsa yuutxi's Dxusa' txã'wěyçxáa yuuwemeesa vxituna. 12 Abrahana' cirkuncidāynisawe'sxtewa isa tata na'wěsa

yuja', txãawe'sx yuu Abraham na'wëy Dxusa's
 ũusuh jxuka yaakxwa'ja's ji'phute yu'.

*Ũusuhçxáa Dxusa's yaakxpa'ga Dxus puutx
 we'weni' kxtey yuuni*

¹³ Aytewa Abrahamana' na'wëçxáak yuu
 txã'sna miijajkxwe: Abraham vxite' txajx
 ji'jwe'sx jii Dxusa' puutx we'wek naa kiwe's
 jxuka txãawe'sxçxaçxáa yamuwa'ja's. Nawa
 Abrahamana' leya's yaakxpa'gaçxáa txã'wë
 Dxusa' yamuwa'ja's puutx we'weme', naasáa
 Abrahamana' ũusuh yuuçxáak Dxusa's jxuka
 yajkx, txãa pa'ga yuuçxáak ewgu yuu jičxa
 naa kiwete yamuwa'ja's vxit. ¹⁴ Txã'wë leya's
 nwëese'jsaçxáa naa kiwe's yamuwa'jsawaça',
 ũusuhçxáa Dxusa's yaakxsa' yamuwa'jsamée
 ne'ta yu', aç'a' kiwe ũsu'nja jina Dxus puutx
 we'wenisa' kxulne' yuuwa'j yu'. ¹⁵ Ley ũste',
 txã'sna kxtey yuumeçxa', yuuwesak ya'yu'.
 Nawa ley meete', ¿ma'wë leya's kxtey yuuya'
 ya'ãjakx?

¹⁶ Txã'wë leymée pa'gaíçxáak Abrahamana'
 ũusuh yuuçxáa Dxusa's jxuka yajkx, aç'a'
 txã'wë yaakxpa'gak Dxusa' naa kiwete jxuka
 yamuwa'ja's puutx we'we Abraham ji'jwe'sxtxi.
 Txãa puutx we'wenisa' leya's ji'phsawe'sx jiiçxáa
 meea', Abrahamwa ma'wëga Dxusa's ũusuh
 yuuçxáa jxuka yajkx txã'wëy yūusawe'sx jii
 yã'jçxa. Txãa pa'ga Abrahamana' kwe'sx jxukaysate
 tata'. ¹⁷ Txajiiik Dxus librutewa na'ji': Nasa
 maazkuëesatewa jxukaysate tata yuuwa'jsa
 idxa's nvxiituçthu jik Dxusa'. Dxus yakha'
 kih yuhwa thëyme'. Txã' uusaatxwa ki'

ĩtxi vxitu'k, sa' kĩh yuhwa vxyaawa'jmeetewa, kaavxya'ja'ja'k.

¹⁸ Dxus Abraham yakh puutx we'wenisa' weh yuhwa kxtey yuuwa'jsamée na'wěçxáak yu'. Nawa Abrahamana' txãa sũhmée Dxus we'weni' kxtey yuuna sũhnaçxáak ũuste yu'akh. Aça' Dxus we'weçxa': Iidx ji'ja' iiméh seena' kuh yuutxna jĩna we'weni' kxtey yuuyujk. Txãa pa'gak nasa maazkuéesatewa jxukaysate tata yuu. ¹⁹ Abrahamana' uuwa'ja'sçxáa yã'kh ũythasna ũsu', cien anxu ji'phuçyã'kh yu' naa pa'ga. Aça' Sara' bagaçxte yuhwa luuçx ji'phuwa'jsameek yu', txã'wěçxáamée thē'khweyã'kh yu'. Makwe txã'wětewa, Dxusa' pu'çxhina sũhwa'j yuuçxá'sku ji'phu' Abrahamana'. ²⁰ Txãasak Dxus we'weni's jxpubana kuh jwed yajxmée Dxusa' kxtey yuuna sũhna yuuçxáa yajxna Dxusa's weçxa. ²¹ Txãa pa'gatey Dxusa' txajx we'weni yu'sa' jxuka kxtey yuuwa'jsa' sũhna yuuçxáak fxi'ze. ²² Txã'wě Dxus we'weni's ma'wěçxáa yuhwa jxpubamée kxtey yuuna sũhwa'j yuuçxá's ũuste yaakxpa'gak Dxusa' Abrahamana's yuuwemeesa vxit. ²³ Nawa Abrahamçxáak yuuwemée ewsa yuu jĩna fxi'jni yuume'. ²⁴ Kwe'sxtxiwa ja'da we'weçxak txã'jĩ', txãa pa'gatey kwe'sxwa Jesusa's ĩtxi vxit-sa Dxusa's ũusuh jxuka yaakxpa'gaçxáa yuuwemeesatha'w. ²⁵ Kwe'sxtxi yuuwemeesa vxit-ya'íiçxáak Dxusa' Jesukristo's pkalsawe'sx pa'gate uuwa'j vxitçxa ki' ĩtxi vxit.

Yuuwemeesa yuupa'ga Dxus yakh fxi'zewa'ja's uyni

¹ Txã'wě Dxusa's ũusuh yuuçxáa jxuka yaakxpa'gaçxáa Dxusa' kwe'sxtxi's yuuwemeesak vxit aç'a' ãçha' Dxus yakh wět fxi'zewa'ja's ji'ptha'w, kwe'sxtxi jxpe'jsa Jesukristo nwe'wepa'ga. ² Txã'wě Kristo kwe'sxtxi nwe'wepa'ga yuuçxáatha'w Dxus yakh wět fxi'zewa'the pa'j, Jesukristo's ũusuh jxuka yaakxpa'ga. Txãasa ãçha' Dxus tasxte pa'jwa'ja's ji'ptha'w, txãasatha'w wala weçxá'. ³ Sa' Dxus tasxte pa'jwa'ja'sçxáa yajkxçxa weçxamée, naa kiwete nxuswa'ja'swa weçxa'tha'w, txãa pa'gatey nxuswa'j en pa'the', jweeíçxáak Dxusa's çxhãçxha yaakxwa'j kaseje'. ⁴ Aç'a' Dxusa's çxhãçxha yaakxwa'j kasehte, Dxus yakh txuteméek ya'fxi'ze'. Aç'a' Dxus yakh txutemée fxi'zeçxa', Dxus luuçxtha'w sũhwa'ja's ya'ji'phu'k. ⁵ Aç'a' Dxus luuçxyã'ja', weh yuhwa ya'thame'çme', txãa pa'gatey kwe'sx ũuste Dxus Espirituçxáa jxuka khêeçxa ũsna Dxus peeygãniçxá's kaajiyu'jna.

⁶ Kwe'sxçxáa yu' ya'nwe'wewa'ja's ãjameeyã'the', Kristo naa kiwete kīwa'j en ãhte' pa'jçxa kwe'sx ewmeesa pa'gate uuk nwe'weya'. ⁷ Kim yuhwa nasa ewmeesatx peeygãhçxa nwe'weya' uumeena. Meeçxa' maaii yu' txã'wě yuuwáatxna, nawa nasa ewsateçxáa txã'wě yuutxna. ⁸ Kwe'sx yakh yu' txã'wě ewmeesa pa'gate uuwa'ja' wala thēya', nawa Dxusa' kwe'sx ewmeesatewa peeygãhçxa txajx Nçxi'ka's naa kiwete kaakh, ewmeesa kwe'sx

pa'gate uukahn. ⁹ Txã'wẽ Kristo kwe'sx pa'gate uupa'ga nwe'wenisatha'w yuu, sa' nmeh ente kastigo iiméh seena'sate yu' wejx nwe'wenisa yu'nja'w. ¹⁰ Txãa pa'gatey kwe'sxa' Dxusa's açesateyuhwa, txãa yakh fxi'zewa'ja's vxitku Kristo's uuwa'j vxitçxa, na' açxh yu' Kristo uupa'ga yuuwemeesatha'w na' wejx nwe'wenisa yu'nja'w. ¹¹ Txã'wẽ yũupa'gatha'w Dxusa's wala weçxá', kwe'sxtxi nwe'wesa Jesukristo' Dxus yakh fxi'zewa'ja's vxitku naa pa'ga.

Adan yakh Kristo yakha' ja'dameeta'

¹² Pkala' naa kiwete teeçx nasate yuuçxáa u'kaçxak uuwa'ja's vxit, txãa pa'gatx jxukaysa naa kakwe uuwa'ja's ji'phu, pkalte wetepa'ga. ¹³ Ley kasehmey, pkala' naa kiwete ũsyã'kh yu'. Nawa ley pta'sxçxa: Naa ewmeesa' jĩna pta'sx ja'damée yu', ewmeesana sũhwa'ja's ya'ji'phu'çmeene'. ¹⁴ Ley yu' meetewa, pkal ũsyã'the íitx Moises meetey Adanwe'sx jxukaysa peekx kakwe uuwa'j ena's ji'phu, Adan na'wëy yu' méé yũuçxa pkalte wetetewa, uu ena' ja'daçxaçxáak pa'j. Ew yajkxte yu', Adana' naa kiwete kĩiwa'jsa ũsu'k txãa na'wësak yu'.

¹⁵ Nawa Adan pkal yakh vxite' kwe'sx ewte neeyũunisa yakha' weh yuhwa ja'dameeta'. Teeçx piçthê'j pkalte wetepa'ga yuuçxáa jxukaysatx uuwa'ja's ji'phu, naapkaçxha' teeçx piçthê'j Jesukristo pa'ga yuuçxáa jxukaysatx txãa pkaluh ewte neeyũuwa'ja's ji'phu. Txã' jxukaysatxku nwe'we naa pa'ga jxthaakwe wala ewsak yu'. ¹⁶ Teeçx piçthê'jsa pkal yuuk txãa pkal yakh Dxus ũsku ewte neeyũuwa'ja's txãa

yakha' weh yuhwa ja'dameeta'. Txãa pa'gatey teeçxsa teedxi'j pkal yũunisaçxáa maazkuêe us pkalsatewa ähsak yu', naapkaçxha' Dxus ũsku ewte neeyũuwa'ja's txã' maazkuêe pkal ji'phsatewa txãaju yuuwemeesak vxitna pa'j. ¹⁷ Teeçxsa yuuwe yuupa'gaçxáa, uuwa'ja' nesku yuuna pa'j. Aça' bagaçxte yuhwa pçumée itxi fxi'zewa'ja' wejx txã'wê bagaçxtewa nes yuuna Jesukristopa'ga.

¹⁸ Adan ewmée yũunisa' jxukaysatxku ewmeekhê vxitna pa'j, naapkaçxha' Jesukristo ew yũunisa' nasa jxukaysatxku yuuwemée ewsa vxit. ¹⁹ Txã'wê teeçx piçthê'j Dxusa's nwêese'pha'gameeçxáa jxukaysatx pkalsa yuu, naapkaçxha' teeçx piçthê'j Dxusa's nwêese'pha'gaçxáa jxukaysa yuuwemeesatx yuuna pa'j.

²⁰ Kĩhçxah yũunisa txã'wê pkaltewa jxuka äate jiyukahn íçxáak leya' kaseh. Aça' pkala's txã'wê ew jiyuçpkaçxha', Dxus peeygãanisa yu' jwee íçxáak thaakwe wala vxyaa. ²¹ Pkala' uuwa'ja'sku vxit, naapkaçxha' Dxus peeygãani' pçumée itxi fxi'zewa'ja'sku vxit Jesukristo nwe'wepa'ga.

6

Pkala's nwêese'jmée Kristo yakhçxáa itxi fxi'zewa'j

¹ Dxus peeygãhna peltunãyni' jweeíçxáa nes yuukahn, ¿pkalte fxi'zena nesmtha'w yuu? ¿Maa sũju'kwe'? ² Kwe'sxa' peena yu' pkalte fxi'zewa'jsameetha'w, txãa pa'gatey

pkaluh txuteeçxa peena yu' nwēese'jwa'jsa meeyã'tha'w, sa' çkĩjxa'çxáa jwee pkalte fxi'zena nes yuukxtha'w? ³ Meeçxa' jiyu'çmeewá'kwe, nawa maawa Kristo Jesus yakh fxi'zeya' yu'te ya'bautisãynijũ', Kristo yakh ja'da uusáa na'wētha'w yu'. Yu'te ya'bautisãyni txã'wē Kristo yakh ja'da uuçxa pedaní na'wē yũunisa'. ⁴ Txãa pa'ga kwe'sxa' uuçxa pedani na'wēsatha'w yuu, aça' Kristowa ma'wēga Dxus pu'çxte uunijũwa ki' ãtxi yuu aça' kwe'sxwa txã'wēy yuusaatha'w. Txãasa wala ew fxi'zewa'j ji'ptha'w.

⁵ Kwe'sxa' Kristo yakh ja'da uusáa na'wē yuuçxa, txãa yakh fxi'zena ũstha'w, txãa na'wēy ãtxi yuuçxa. ⁶ Txãasa jiitha'w Kristo' kwe'sx pkala's ivxiituya' kluuste uuk, kwe'sxa' peena yu' pkalte fxi'zekahmen. ⁷ Aça' pkala' peena yu' jxkaajxa' ãjawa'jsame', txã'wē uusáa na'wē yuusa yã'txhi's. ⁸ Txãa pa'gatey kwe'sxa' Kristo yakh ja'da uusáa na'wē yuuçxa ãçxha' txãa yakh ãtxi fxi'zena ũstha'w naa pa'ga. ⁹ Kwe'sxa' jiitha'w Kristo' uuçxawa ki' ãtxi yuunijũyã'ja', uu ena' peena yu' pa'jmeena txã'sa'. ¹⁰ Kristo' pkala's nmeh ivxiituya' teedxi'j yuuçxáak uu, txajũyã'ja' bagaçxte yuhwa peena yu' uuya'mée. Sa' ãçxha' Dxus yakh ãtxi nes yuuwa'jsa' bagaçx entewa. ¹¹ I'kwe'sxwa txã'wēy uusáa na'wēçxáa mfxi'zewe, pkala's peena yu' nwēese'jmée naasáa Dxus yakh yuuçxáa mfxi'zewe, Jesukristo's pi'kçxa.

¹² Pkala' peena yu' jxkaahwa'j ji'phme' i'kwe'sx kakwete, nawa nwēese'jewá'kwe aça' txãái

ki' jxkaajana. ¹³ I'kwe'sx kakwe's pkalte kselpi'jnuwe, wejxwa Dxus kusete mekselpi'jwe, txãa pa'gatey Dxusa'sçxáa selpiiya' sũhçxa ki' ãtxi yuusáa na'wësa i'kwe naa pa'ga. Aça' i'kwe'sx kakwe' Dxus kusete ewsa yuuçxáana selpiina. ¹⁴ I'kwe'sxa' jii i'kwe, leya' nwe'wewa'jsame', naa pa'ga açxha' Dxus nwe'wenite ũsi'kwe aça' pkala' peena yu' i'kwe'sx kakwete jxkaahwa'j ji'phme'.

Dxusa's yuuçxáa selpiiya' utxani

¹⁵ Txã'wë leya' nwe'weya' ãjãmeeyã'the', ¿ki' pkalteyçxáa fxi'zemtha'w, Dxus nwe'wenite ũsçxawa? Weh yuhwa pkalte fxi'zewa'jme'. ¹⁶ I'kwe'sxa' ew jii i'kwe, selpiina nwëese'jya' sũhçxa maawa patron tasxte pa'jçxa', txãa yuuçxá's i'kwe nwëese'jna selpi'. Txã'wëyíçxá' pkala'sçxáa nwëese'the', ewmeete vxituwa'jçxáak kaseje', naapkaçxha' Dxusa'sçxáa nwëese'the', Dxus yakh ew fxi'zewa'jçxáak kaseje'. ¹⁷ I'kwe'sxa' nyafxíia' pkala'sçxáa i'kwe selpisáa yu'. Nawa açxha' Dxus pu'çxte', ũusuh jxuka weçxana i'kwe kaapiya'jni ewsa's jxpa'ga txã's yuuçxáana nwëese'jna. ¹⁸ Txãasa i'kwe pkaluh txuteyã'jçxa', ew yũuna Dxusna selpiina fxi'zewa'the pa'j. ¹⁹ (I'kwe'sx ew jiyukahnthu naa kiwega selpinisa yakh kaaja'da'jçxa pta'sx.) Nyafxíiwa ma'wëkwe i'kwe'sx kakwe's ewmeeteçxáa kselpi'jna ũsu', txã'wëy açxha' Dxus kusete yuuçxáa ya'mdukhwe i'kwe'sx kakwe's txãa yuuçxá's selpiiya'.

20 I'kwe'sxa' nyafxiaa' ew yūuna fxi'zewa'ja's nwēese'jmée pkalte yuuçxáa fxi'zena ūşçxa',
 21 kxte' ĉkĩjkwe ewsa uy, txā'wē thaampa'teçxáa fxi'zena ūşçxa'? Txā'wē fxi'zete', naasáa uuwa'j yuuçxáak vxya'. 22 Nawa pkaluh txuteyā'jçxa', Dxusna selpiwa'the i'kwe pa'j, aça' kxte yuuçxa' ewsa vxyaayuju'íik. Txā'wē yūuçxa', kīh pkal yuhwa ji'phmée fxi'zewa'ja's ya'jypa'ga'k, sa' nmeh ente' bagaçxte yuhwa pçuwa'jmée ĩtxi fxi'zewa'ja'swa ya'ji'phuna. 23 Txā'wēme', pkala' naasáa uuwa'ja's yuuçxáak ūsu'. Nawa Dxusa' bagaçxte yuhwa pçumée ĩtxi fxi'zewa'ja'sku peesu', Kristo Jesus nwe'wepa'ga.

7

Ptamuní ley yakh kaaja'dajni

1 Yakhtě'jwe'sx maawa leya's jiisa' peekx jii i'kwe leya' naa kiwete nasa nee ĩtxiyteçxáa jxkaajxa' ājawa'jsa'. 2 Ptamuuçxa fxi'zeni leya's miijajkxwe wakx: U'y iimi'sa' txajx nmi' uu ja'damée yu' vxite yakh iimi'ya' ājāwa'jsame'. Txā'wē txajx nmi' uumey vxite piçthě'j yakh utxaaçxa fxi'zeçxa', pkal yuusak yu' jī'k. 3 Nawa nmi' uunijūyā'ja', peena yu' txā'wē jxkaahna nes yuuya' āja'çme', aça' txajx nmi' uunijū' vxite piçthě'j yakh iimi'ya' ājawa'ja'sku jxkaaja'.

4 I'kwe'sxwa txā'wēy Kristo tasxte utxaasá' uusáa na'wēsai'kwe, aça' leya' uusa's jxkaajxa' ājawa'jsame'. Aça' āçxha' i'kwe'sxa' Kristo uuçxa ki' ĩtxi yuuk txajx nasai'kwe, Dxus yuuçxáana selpiina fxi'zewa'jsa'. 5 Txā'wē Kristo tasxte utxamey, kwe'sx ewmée yūuya' yaakxnix

ley pta'sxçxa': Ewme' jĩ'k txãatxiçxáak wejx thaakwe yaakx wẽe yuu. Aça' txã'wẽ yaakxpaga Dxus kastigote uuwa'jçxáak yuu. ⁶ Nawa açxha' leya' kwe'sxtxi thegwa'j ji'phme'. Txãa pa'ga açxha' Dxus Espiritu jxkaahniçxá's nwẽese'jwa'j ji'ptha'w, leya's yajxmeé.

Adx ũuste pkal ũssa

⁷ Txã'wẽte', leya' ewmeesana ¿sũju'kwe'? Weh yuhwa txã'wẽme'. Txãa leya' naasaa kĩh txã'wẽ pkaltewa pta'sxsaçxá'. Ley pa'gameewaça', adxa' jiyuwa'jmée ne'tka yu' kĩh txã'wẽ pkaltewa. Ley pta'sxçxa': Vxite jĩitx kusa'j wẽena ewmée yũuwa'ja's yajxna fxi'zewa'jme' jĩmeewaça', adxa' jiyuwa'jmée ne'tka yu' txã'wẽ yaakxnisa' pkaltewa. ⁸ Ley pta'sxçxa': Txã'wẽ yaakxni' ewme' jĩnijũk adx ũuste jweeĩçxáa ewmée yũu wẽenisaçxáa ũusuthe. Ley txã'jĩmeewaça', pkalna sũhwa'j kasehwa'jmeene' yu'. ⁹ Adxa' nyafxiia' ley pta'sxni's jiyumey yu', yuuwemeesath sũju'çxáath. Nawa ley pta'sxni's jiyunijũk jweeĩçxáa ewmée yũu wẽe yuu. Txãa pa'gath isa yuuwesa ne'tka sũhwa'ja's ji'phu. ¹⁰ Txajuth isa ew jiyu, leya' nwe'wepkaçxte, ewmée yũuwa'ja's kçxhãaçxha'jsaçxáak yuu adx yakha'. ¹¹ Txãa pa'gatey pkala' leypa'gáiçxáak jweeĩçxáa çxhãçxhaçxa adxa's Dxus kastigote uuwa'j vxit.

¹² Txã'wẽçxawa, leya' ewmeesame', txãa pa'gatey leya' kĩhtewa jxuka ew yũuna fxi'zewa'ja'sçxáak jxkaaja'. ¹³ Txã'wẽ leya' ewsaçxa', ¿ma'wẽki'k adxa's Dxus kastigote

uuwa'j vxit? sūju'th. Nawa ley txā'wē uuwa'j vxitme'. Ewmée yūu wēenisak Dxus kastigote uuwa'j vxit. Isa ew jiyute yu', ley jxkaahni ewsa's nwēese'jmée ewmée yūu wēenisaçxá's nwēese'pha'gak txā'wē pkal yu'. Aça' txāa pa'gak nwēese'jnimeesa' pkalna sūhna jiyunijū' yuuwesa uuwa'j ya'yu'.

¹⁴ Jiitha'w leya' Dxus yakh fxi'zewaja's yuh pta'sxi'k. Nawa Dxus yakh fxi'zemée ewmée yūuwa'ja'sçxáath yajkxna fxi'ze', naa pa'ga yuuwesa' adxthu. ¹⁵ Adxa' jiyu'çmeeth ma'wēçxa ne'tka adxna selpiwa'jsa yu'sa' kxtey yuumeçxa', adxna ewmée vxitwa'jsa yu'sa' kxtey yu'. ¹⁶ Ley pta'sxçxa' ewme' jī'k aça' ewmeesatewa jiiçxath txāa ewmeesa's iïçxáa kxtey yu', txāa pa'gath leya' yuuwemeesana sūju'. ¹⁷ Peekxçxáa txā'wē ya'yu'çmeene'. Adx ũuste ewmeesa ũsna txāane' txā'wē ewmée yūuwa'ja'sçxáa kaaūsuthe'je'.

¹⁸ Txāa pa'gath adx ũuste' kīh yuhwa ewsa yu' meena sūju'. Txajiiçxáa ne'tka ewsa's nwēese'j wēeçxawa, kxtey yuuya' āja'çmée.

¹⁹ Naasáa selpiwa'jmeesaçxá's kxtey yuuçxa', selpiwa'jsa yu'sa' kxtey yu'çmeeth. ²⁰ Na'jī'th na': Adxna ewmée vxitwa'jsa yu'sa' kxtey yuuçxa', peekxçxáa txā'wē ya'yu'çmeene', adx ũuste ewmée kaaūsuthe'jsa ũsna txāane' ewmeesaçxá's kxtey yuuwa'ja's kaaūsuthe'je' açne' txā'wē ya'yu'.

²¹ Txajiiçxáak ewsaçxá's kxtey yu'nja sūhtewa, ewmée yūuwa'jçxáa kaseje'. ²² Adx yu', Dxus leya's kxtey yu'nja sūhtewa, ²³ adx ũuste ewmeesa ũsna txāak ew yūuwa'ja's

kaaũusuthe'je'çmée. Txãasak adxa's ewmeete yuuçxáa jxpe'je'.

²⁴ Adxa' seena' yuh ãhmeesath. Aça' adxa's çkim nwe'wekx naa kakwe na'wē uuwa'the yuuçxáa pe'jna u'jweça' txãajũ? ²⁵ Txã'wētewa Jesukristo' pejka nwe'wek txãajũ, txãa pa'gath Dxusa's wala weçxá'. Txã'wēme', nyafxíi yu' Dxusa's selpi'nja sũhçxawa, adx ũuste ewmée yũuya' yaakxniçxá'sthu selpi'.

8

Dxus Espiritu's nwēese'pha'ga Dxus yakh fxi'zewa'kh kaseje'

¹ Txã'wē Kristo Jesus nwe'wepa'ga, kwe'sx kakwe ewmée yũuya' yaakxni's nwēese'jmée naasáa Dxus Espirituçxá's nwēese'jna fxi'zesawe'sx yakha' açxha' kĩh kastigo yuhwa meea'. ² Txãa pa'gatey Dxus Espiritu itxi kaafxi'ze'jwa'jsa' nwe'wek txã'wē pkalteçxáa fxi'zenijũ, sa' uuwa'theçxáa yã'j ũstewa txãajũwa nwe'wek, Kristo Jesus yakh fxi'zepa'ga. ³ Moises leya' kwe'sx kakwe ewmée yũunijũ txuhdeya' ãjameeyã'the', Dxusa' txajx Nçxi'ka's kaakh nasaa kakwe's ũsçxa. Aça' txãa kakwe yakh kluuste uuçxak pejka nwe'we, pkala' peena yu' ewmée yũuna kaafxi'ze'khamen. ⁴ Txã'wē kluuste uuçxak kwe'sxtxi nwe'we, kwe'sx kakwe ewmée yũuya' yaakxni's weh yuhwa nwēese'jmée Dxus Espirituçxá's nwēese'the', Dxus leya' kĩhtewa jxuka ew yũuna fxi'zewa'ja'sçxáak jxkaaja' txã'sna pejka kxtey yuuya' ãjakahn.

5 Txãa pa'gatx ewmée yũuna fxi'zenijũ nwe'wenisa' Dxus yakh fxi'zewajçxá's yajkxna fxi'ze', naapkaçxha' ewmée ũus yaakxni's yu'pthehnimeesa' ewmée yũuwa'ja'sçxáatx pa'pçxuna fxi'ze'. 6 Aça' ewmée yũuwa'ja'sçxáa pa'pçxute', Dxus kastigote uuwa'jçxáak kaseje'. Nawa Dxus Espiritu's nwēese'the', ũuste wēt fxi'zewa'kh kaseje'. 7 Txã'wē ewmée yũuwa'ja'sçxáa pa'pçxusa', Dxusa's açesata'. Txã'wēçxaiitx Dxusa's nwēese'je'çmée, sa' leya'swa kxtey yuuya' ãja'çmeeta'. 8 Txã'wē ewmée yũuya' yaakxni's yu'pthehnimeesa' Dxus yakh iiwehdxi fxi'ze'çmeeta'.

9 Nawa i'kwe'sxa' Dxus Espiritu's ũuste ji'phçxa', ewmée yũuya' yaakxni's nwēese'je'çmeei'kwe, naasáa Dxus Espirituçxá's i'kwe nwēese'je'. Aça' Dxus Espiritu's ũuste ji'phmeesa' Kristo jĩimeeta'. 10 Nawa Kristo' i'kwe'sx ũuste fxi'zena ũste', makwe kakwe yu' pkalpa'ga uuwa'jsatewa Dxusa' i'kwe'sxtxi' ki' itxi vxituna, txãa pa'gatey Dxusa' i'kwe'sxtxi yuuwemeesak vxit naa pa'ga. 11 Txã'wē Kristo Jesus uuniijũwa ki' itxi vxit-sa Dxus Espiritu' i'kwe'sx ũuste fxi'zena ũsçxa', i'kwe'sx uutewa ki' itxi vxituna petx kakwe yã'jçxa.

12 Txãa pa'ga Dxus Espirituçxá's nwēese'jna fxi'zewa'jsatha'w, ewmée yũu wēenisa's nwēese'jwa'j ji'phmeetha'w. 13 Txã'wē ewmée yũu wēenisa's nwēese'jna fxi'zeçxa', bagaçxte yuhwa Dxus yakh fxi'zewa'jmeete u'jwene'kwe. Nawa Dxus Espiritu pu'çxte ewmée yũu wēenisa's nwēese'jmée jxukate nvxihtçxa',

bagaçxte yuhwa pçumée ïtxi fxi'zewa'the u'jwene'kwe.

¹⁴ Aça' maawa jxukaysa Dxus Espiritu jxpe'jnisa' Dxus luuçxta'. ¹⁵ Ew mjiyuwe: I'kwe'sxtxi jxpe'jsa Dxus Espiritu' nyafxii ley ma'wēga seena' jxkaaja' txã'wē seena' juuna' jxkaahwa'jsame', wejxwa Dxus luuçx yuukahn pu'çxsaçxá' ũukhmée weçxana fxi'zekahn. Txãasaíik kwe'sx ũuste na'wēçxáa kaaũusuthe'je' Dxusa' kwe'sx Tatana sũhwa'ja's.

¹⁶ Txãasak Dxus Espiritu' kwe'sx ũuste khēeçxa kwe'sxtxi kaaũusuthe'je' Dxus luuçxtha'w sũhwa'ja's. ¹⁷ Txã'wē Dxus luuçx yã'ja', Dxus jĩ's jxuka jxpa'gawa'jsatha'w. Dxusa' txajx jĩ yu'sa' jxuka Kristo's ũsuna txã'sna kwe'sxwa jxpa'ga'nja'w Kristo yakh ja'daçxah. Nawa Kristo yakh pxthaa yuuwa'ja's ji'phuçxa yuuçxáa cielute txã'wē jxpa'ga'nja'w Kristo yakh ja'daçxah.

¹⁸ Cielute txã'wē seena' wēt wēt-sa's jxpa'gawa'jsatha'w, txãasa naa kiwete pxthaa yuunisa's le'çxkuēçxáa yuhwa yaakxwa'j ji'phmeene'tka'w sũju'th. ¹⁹ Txãa pa'gaiiçxáatx Dxus pheu'jçxa nvxiitnisa kĩjkĩhwa jxuka txakwe wala ũythasu', açxhíi yu' txakwe wala nxusna ũsçxawa, Dxus luuçx jxukaysatx jxukate nwe'wewa'j en seena' zhiçxkwe yũuwa'ja's.

²⁰ Txã'wē Dxus pheu'jçxa nvxiitnisa kĩjkĩhwa jxuka nxusna ũskahníi jxukatx ewmeeteçxaçxáa nvxiitni neeyũu. Txãasatx Dxus nwe'wewa'j ena's txakwe wala ũythasu', Dxus pheu'jçxa nvxiitnisa' peekçxáa txã'wē ewmeete neeyũumeeta', Dxusa' ma'wē nwe'wewa'ja'swa

jiiçxane' ewmeete weteyã'the', txagaçxhíi yu' nwe'wemée kxtee nvxiht. Txãa pa'gatx txakwe wala nxusu'. ²¹ Aça' Dxus nwe'wewa'j en ãhte', txajũ yuuçxá' kĭjkĭhwa jxuka açxh na'wē ewmeete ũsta' txãajũ nwe'weni yuutxna Dxus luuçx yakh ja'daçxah. ²² Jiitha'w açxhíi yu' kĭhwa jxuka wala yuh seena' pxthaa yuuna u'y nasate yaakasá na'wē pebeena ũsta'. ²³ Nawa Dxus pheu'jçxa nvxiitnisaçxáamée txã'wē pxthaa yuuna ũsta'. Kwe'sxa' Dxus ũsni yu'sa' jxuka jxpa'gawa'jsaçxa nyafxte ũsni txajx Espiritu's jxpa'gayã'tha'w. Nawa kwe'sxwa ja'da pxthaa yuuna ũstha'w, kwe'sx kakwe ki' ĩtxi yuuwa'j en ãhte Dxus luuçx jxukaysatx jxukate nwe'wewa'j ena's ũythasna. ²⁴ Txã'wē kwe'sx kakwe ki' ĩtxi yuuwa'jsate iíçxáak Dxusa' nwe'we, aça' ĩtxi yuuwa'ja's jiiçxatha'w ũythasu', txã'wē yuuwa'j en pa'jyujuna sũhna. ²⁵ Txã'wē ĩtxi yuuwa'ja's jiimeewaça', çkĭjxa'çxáa ũythasukxtha'w? Nawa txã'wē yuuwa'j en ãhmeya', nawa e'suçxáawa ãayujuna sũhnatha'w ũythasu'.

²⁶ Txãa pa'gaiíçxáak Dxus Espiritu kwe'sx ũuste khêeçxa pu'çxna kçxhãaçxha'ja'. Kwe'sxa' Dxus yakh ma'wē puutx we'wewa'ja'swa jimeeçxa sxiiguçtewa, Dxus Espiritu' kwe'sx pa'gate Dxus dxi'pte wala pa'pçxu'k iiméh wala nxus yajkxna. ²⁷ Aça' Dxusa' ũus yaakxni's jiisa', txãasak Dxusa' jiyu txajx Espiritu yaakxni's, Dxus Espiritu' naasáa Dxus kxtey yu-uwa'ja'sçxáak jxthãasu' kwe'sx jxukaysa pa'gate.

Kĭh yuhwa txuhdemeetxna Dxus yakh fxi'zesatx

28 Kwe'sxa' nxuswa'j ena's yaakxwa'j ji'phmeetha'w, txãa pa'gatey en ma'wēsawa pa'jçxawa, txãa yu' jxuka selpiwa'jsaçxaçxáata' Dxusna yaakxsawe'sx yuutxi's txã'sa' ew jiitha'w. Sa' txãawe'sxtxi' kīh yuuya' ne' Dxusa' txhitxh txãa yu'sa' kxtey yuuna. 29 Txãasaíik maaçxah ne'ta txajx tasxte pa'jwa'jsa yu' txãa yuutxi' jxuka jiyuçxa nyafxíi entey txhitxh txajx Nçxi'k na'wēy yuukahn, aç'a' txajx Nçxi'k yu'sa' nyakh nthē'jsa yuuwa'jsak vxitçxa nvxiht. 30 Sa' txajx txhitxhnisatxi's txajx tasxte nuypa'kh, sa' txajx tasxte pa'jsatxi's yuuwemeesak vxit, sa' yuuwemée vxitnisatxi's txajx Nçxi'k yakh ih ūswa'jsak vxit.

31 Dxusa' kwe'sxtxi's txã'wē seena' ew yūute', ¿kim kwe'sxtxi' ewmeete nvxiht-ya' ājakx? 32 Dxusa' txajx Nçxi'ka's yuhwa ūçxhi'dxmée kwe'sx jxukaysa pa'gate kluuste uuçxa nwe'wekahn ūsku. Txajx Nçxi'ka's yuh ūsuççxa', kwe'sx kījke peejini yu'sa' wejx thaakwe thēymée ūsuna. 33 Dxus txhitxhçxa yuuwemée vxitnisatxi', ¿kim ewmeesata' jīya' ājakx? 34 Kristo' kwe'sxtxi nwe'weya' uuçxa ki' ĩtxi yuuçxa āçxha' Dxus paçu ju'gte ūsa' kwe'sx ju'gu we'we pu'çxna, aç'a' ¿kim kwe'sxtxi ewmeete nvxiht-ya' ājakx? 35 Na'wē' aç'a' Kristo peeygāanisatxi's ¿kīhçxá' txajū txuhdeya' ājama'k? Meeçxa' nxuswa'j en, yaaçewa'j en, pkxuwa'j en, wēje en, sūpxçxáa nvxiitwa'j en, ūukhūukhte yuuçxáa fxi'zewa'j en, ikhte uuwa'j en kīhwa thēysa pa'jana. 36 Txajíik Dxus librutewa txã'wē yūuwa'ja's we'weçxa' na'jī': Dxus yakh fxi'zepa'ga ikhte uuwa'jsaçxáatha'w,

Piisxakuẽ's ikhya' jxũna u'jnisa na'wẽ kĩh entewa jĩ'k.

³⁷ Makwe txã'wẽ seena' yuuwa'j en pa'thewa, txãatxi' jxuka knaywa'jsatha'w, kwe'sxtxi peeygãasa Kristo pu'çxa'ga. ³⁸ Txãa pa'ga Dxus peeygãanijũ' kĩh yuhwa txuhdeya' ãjawa'jsame's ew jũith: uu en ma'k yuu, meeçxa' naa kiwega ĩtxi fxi'zewa'j ma'k yuu, Dxus angeleswe'sx ma'tx yuu, eçxthẽ'j angeleswe'sx ma'tx yuu, meeçxa' eçxthẽ'j yuu ma'k yuu, meeçxa' ãçxh naa ensu nakwe seena' yuuçta' txãa ma'tx yuu, meeçxa' vxite en seena'sa yuhna txãa ma'tx yuu, ³⁹ meeçxa' infxiernojuwe'sx seena'sa ma'tx yuu, nawa Dxus peeygãanijũ' kĩh yuhwa txuhdeya' ãjameena, txãa pa'gatey kwe'sxtxi jxpe'jsa Kristo Jesus nwe'wenisa yã'tha'w naa pa'ga.

9

Dxus Israelwe'sxtxi txhitxhni

¹ Adx jĩ'j judiuwe'sxtxi iiméh wala peeygãhna bagaçxtewa adx ũuste nxusna yuuçxáath fxi'ze'. ² I'kwe'sx pa'gate adxa' Kristo yakh ũswa'ja's ivxiitute', i'kwe'sx jxukaysa ewte neeyũune'jwaça', adxa' peeygãaweete kxtey yu'nja sũju'th. ³ Adxa' i'kwe'sxtxi txã'wẽth wala peeygãja' jĩçxa' ĩsxiiçxa txã'jĩçmeeth, txãa pa'gatey Kristo yakh fxi'zesaçxa' Dxus Espiritu kaaũusuthe'jniçxá'sthu we'we'. ⁴ Adx jĩ'jwe'sxa' Dxus txhitxhnisata', naa pa'ga Dxus luuçxta'. Txãapa'gak Dxusa' txãawe'sx ksxavxyte pi'kxna ũsu' eena' kweethna. Sa' ma'wẽçxah

pu'çxwa'ja'swa puutx we'wek. Leynawa ũsku. Dxuus yatte ma'wẽ yũuwa'ja'swa pta'sxku. Sa' kiwe's jxuka yamuwa'ja'swa puutx we'wek. ⁵ Txãawe'sxa' nyafxte Dxus txhitxhnisa Abraham ji'tha', açã' txãawe'sx ji'thek Kristo upxhna ũsu' nasaa kakwe yakh. Txãa Kristo' Dxusiiçxáak yu', bagaçxtewa tuuthe'jni yuuwa'jsa.

⁶ Israelwe'sxtxi Dxusa' nwe'weya' puutx we'wek txã'sa' kxtey yuumée yu' yuume'. Israel ji'j judiuwe'sxa' maafi yu' Dxus luuçx yu'çmeeta', txãa pa'gaçxáak maafi yuutxi' kxtey yuumée. ⁷ Txã'wẽy Abraham ji'jwa jxukay yu' Dxus txhitxhnisa yu'çmeeta', txajíik Dxusíwa na'jĩna áate pta'sx: Iidx nçxi'k Isaakte upxsaçxáa iidx ji'j adx txhitxhnisa yuutxna jĩ'k. ⁸ Açã' Abraham ji'tha'w naa pa'ga Dxus txhitxhnisatha'w sũhwa'ja's ji'phmeeta' jxukay yu', naasáa Dxus puutx we'wenite upxsaçxáa Abraham ji'tha'. ⁹ Txãa pa'gately Dxusa' na'jĩnak Abraham yakh puutx we'we: En áhte', sxawedu'nja, açã' Sara' teeçx nçxi'k ji'phuna jĩk.

¹⁰ Txã'wẽ Isaak upxwa'ja'sçxáa we'wemée, Rebeka nçxi'k e'zsa upxwa'ja'swa we'wek. Txãawe'sx neya' Isaakku yu', kwe'sx yaçgawe'sx. ¹¹ Sa' txãa e'z nçxi'ksa upxyuumeyna, Dxusa' txhitxhku txãawe'sx ma'wẽ yũuna fxi'zeni's uymeyçxawa. ¹² Txãasak Dxusa' na'wẽ we'we Rebeka's: Nyakh yaçtewe'sxa' e'stewe'sxa's selpisáa yuuna jĩnak we'we. Ew jiyute yu', Dxusa' ew yũusaçxáatx txhitxhwa'jsa yu'çme', maatxwa txajx wedxni yuutxi' txhitxhwa'jsaçxáak yu' txã'wẽ yũuwa'ja's

kaajiyu'jnak makwe judiu ji'thewa pxakh e'zii yuutxi' txhitxhmée, teeçxsaçxáana txhitxh.
 13 Aça' Dxus librutewa txã'wëyçxáa we'wena fxi'jni ũsa': Jakoba's peeygãhth, nawa Esaua's peeygãhmeeth jĩ'k.

14 Dxusa' çewmeesaçxa ma'k txã'wë ma'wësatxwa txhitxhi'? Ewmeesa yu'çme'.

15 Txã'wëmeeçxaíik Moisesa's na'jina we'we: Adxa' ma'wësanawa peeygãjaçxá'nja, sa' txã'wëy ma'wësanawa pu'çxhiçxá'nja jĩ'k.

16 Txã'wë kwe'sx kĩhçxáawa pa'pçxuçxa Dxus peeygãani's ya'jypa'ga'çme'. Kwe'sx kakweju kĩhwa pa'pçxumeetewa Dxusa' peeygãjaçxáak maatxwa.

17 Dxusa' ma'wësanawa peeygãjaçxáana, sa' txã'wëy wa'lwa'jsa yu'sa' ma'wësanawa kxtee nvxiituçxáana. 18 Txãasafi Egipto kiwete jxkaahsa's Dxus librute pta'sxi'k na'jina: Idxa's jxkaahwa'jsath vxit, adx kĩjxa'wa jxuka ãjani's iidxpaga nasa jiyukah, sa' adxa's kimtewa naa kiwete jxuka jiyukahnthu idxa's txã'wë yũu jĩ'k.

19 Txã'jĩte', na'wë yaakine'ga: Dxusíi ne' ma'wë yũuwa'ja'swa vxitu', aça' kwe'sxa' yu-uwemée ne'tka'w sũjune'ga. 20 Nawa ũus miijajkx: Kwe'sx ma'wë yuuwa'jsatewa Dxusa' jiiçxane' txã'wë yũ', aça' idxa' txã'wë yaakxwa'j ji'phmeeg. Kiwe mitxha' çKĩjxa'ga adxa's txã'wë umu'? jĩsaate jiimeetha'w. 21 Mitxh umsa' ma'wë mitxha's umweçxtewa txajx wedxni yu'sa' vx-ituçxáana, txãa kiwe's íiçxáa ewte selpiwa'jsa, vxite' ewmeete selpiwa'jsa.

22 Dxuswa nasatxi' txã'wëyku vxit. Sa' maaiitxi's wa'lpa'ga kastigo seena'sate ũswa'jsa

vxitçxawa, peeygãhçxa makwe txaçxwa ãythasku dud yu' kastigaĩmée. ²³ Sa' vxite wa'lsameetxi's êe walate seena' zhiçxkwesa's jxpa'gawa'jsak vxit, txã'sna jxpa'gawa'jsatxi' nyafxíi enteyku txhitxh. Aça' kxteewe'sxa' kwe'sxtha'w txajx peeygãanisa. ²⁴ Dxusa' maatzwa txhitxhwa'jsaçxá', txãasaík maaiútxi' judiu ji'jtxwa txhitxh, sa' judiu ji'jmée vxite nasatxwa txhitxhku. ²⁵ Txã'wẽ maatzwa txhitxhwa'ja's Oseas librute na'jĩnak we'we': Adx txhitxhnimeesatewa, adx nasa vxitu'nja. Sa' adx peeygãanisameetewa, adx peeygãanisa vxitu'nja jĩ'k.

²⁶ Sa' nyafxíi we'weçxa': Adx luuçxmée i'kwe jĩçxawa, txãa e'su': Dxus ãtxisa luuçx yuune'kwe jĩna we'wena jĩ'k.

²⁷ Nawa Israelwe'sxtxi we'weçxa' na'jĩ'k Isaiasa': Israelwe'sx ji'ja' kwet muse na'wẽ seena' kuhsaçxawa, kuhméeçxáa ewte neeyũutxna.

²⁸ Ewsa' kuhméeçxáa yuukahníi wa'lsatxi's dud ivxiituna Dxusa' jĩ'k. ²⁹ Txã'wẽ yũuwa'ja's we'weçxak Isaiasa' na'jĩ':

Dxus kíhtewa jxuka ãjasa judiu ji'jtx mazkuẽ nvxihtmeewaça',

Sodoma vxite' Gomoçxa çxhab na'wẽ jxukate vxituwa'jsa ne'tka'w yu' jĩ'k.

Yuuwemeesa yuuya' Kristoçxá's jxpa'gani

³⁰ ãçxha' na'wẽ yũuni's miyajkxwe: Judiu ji'jmée vxite nasa' yuuwemeesa yuua'ja's pakwesameeçxawa, Kristo's ũuste wa'lmée jxpa'gasa yuupa'gaçxáa yuuwemeesatx yuuna pa'j. ³¹ Naapkaçxha' Israelwe'sxa' yuuwemeesa

yuuna pa'jya' sũhçxa leya'sçxáatx kxtey yuuya' yajkx. Nawa leya'sçxáa yajkxçxa', yuuwemeesa yuuya' ãjameeta'. ³² ¿Kĩh yuuçxata ãjamée? Yuuwemeesa yuuya' Kristo's ũusuh jxuka yajkxçxa jxpa'gameeta' naa pa'gatx ãjamée. Kristo's ũusuh jxuka yaakipkaçxte, leya'sçxáatx yajkxna ũsu', txãasatx wala jxpuba. ³³ Txã'wẽ jxpubawa'ja's Dxus librute na'wẽ pta'sxna fxi'jni': Adxa' Jerusalen çxhabte kwet ki'puçthu, maaitxi' kaypuba'jçxa pẽtxwa'jsa. Nawa maawa txã'sa' jxpubasamée yu', nxuste neeyũumeetxna jĩ'k.

10

¹ Yakthẽ'jwe'sxtxi isath we'we': Israelwe'sx ewte neeyũuwaça' sũhçxath ũusuh jxuka Dxus yakh puutx we'we'. ² Adxa' jiith Israelwe'sxa' wala yuh Dxusa's pakwena pa'pçxuna fxi'ze'tx, nawa ma'wẽ Dxusa's pakwewa'ja'swa ew yu' jiimeeta'. ³ Txã'wẽ ew yu' jiimeeçxaĩtx yuuwemée ewsa yuuya' sũhçxa txãawe'sxtxi ma'wẽne' ew thegu' txã'sçxáanatz kxtey yuu wẽje', Dxusna ma'wẽ pakwewa'ja'swa Dxusĩ pta'sxna nvxihtku txãa yu'sa' kxtey yuumée. ⁴ Txã'wẽ Moises ley jxkaahwa'j en skhẽwnijũ' Kristo jxkaahwa'jsa', yuuwemée ewsa vxit-ya' ãjawa'jsa txã'sna jxpa'gasa yuutxi's. Nawa txã'sna pakwemée leya'sçxáa kxtey yuu wẽete', yuuwemeesa ya'yu'çme'.

⁵ Txajĩk ley jxkaahni's nwẽese'jçxa yuuwemée ewsa yu'nja sũhna yaakxsatxi's Moisesa' na'jĩna fxi'j: Maawa ley jxkaahni's jxuka kxtey yuusa' een isa ew fxi'zewa'jçxá's ji'phutxna

jĩ'k. ⁶ Nawa yuuwemée ewsa yuuna pa'jya' yu', Kristo's ũusuh jxuka yaakxwa'ja's Dxus libroute na'wěk pta'sxi': Kristo' kījxā'kh aça' cielun pe'jya' u'jwa'ja's yaakxwa'jme'. ⁷ Sa' txā'wěy Kristo' ĩtxi yuuyā'kh aça' pedaniikhēwa pe'jya' u'jwa'ja's yaakxwa'jme'. ⁸ Txā'wě thēysa's yaakxkahmení, Dxus yuwe ewsa' iidx yuwete ih ũsa', thēymée ũuste khēeya' jĩ'k. Dxus yuwe iidx yuwete ih ũsa' jĩ'k txā'sna thēymée jxpa'gawa'ja'stha'w pta'sxi'. ⁹ Aça' na'wěçxáa myũu: Dxus Nçxi'k Jesukristo uutewa Dxusíi ki' ĩtxi vxitku sũhwa'ja's ji'phuçxa Kristo yuuçxá's nwēese'jya' jxpa'gawa'ja'. Txā'wě yuuçxa' ewte neeyũune'ga. ¹⁰ Txā'wě ewte neeyũuya', Jesukristo's ũusuh jxuka yajkxçxa jxpa'gawa'ja', sa' āatewa tuuthe'jwa'ja'.

¹¹ Kristo's ũuste jxpa'gasatxi's Dxus libroute na'wěk we'we': Txā'sa' ũuste jxpa'gasa' maa yuhwa nxuste neeyũumeetxna jĩ'k. ¹² Sa' judiu jĩ'j vxite' judiu jĩ'jmeesawa txāa na'wěçxaçxáa yuuwemée ewte neeyũuwa'jsata', txāa pa'gatey Jesukristo' jxukaysatx nwe'wewa'jsa'. Aça' txā'sna neewe'wesa yuutxi'sa' maatxwa jxukaysatx pu'çxwa'jsa'. ¹³ Txajíik Dxus libroute na'wě we'we': Maawa jxukaysa ũusuh yuuçxáa jxuka yajkxna Dxusa's neewe'wesa', yuuwemée ewte neeyũutxna jĩ'k. ¹⁴ Nawa ¿ma'wě neewe'weya' ājatxki, txā'sa' ũuste ji'phmeeçxa'? Sa' ¿ma'wě ũuste jxpa'gaya' ājatxki, txā' nwe'wesa' jĩna pta'sxni's iiwēse'jmeeçxa'? Sa' ¿ma'wě wēse'jya' ājatxki, kimwa txāa yuwe's pta'sxmeete'? ¹⁵ Sa' ¿ma'wě txāa yuwe's pta'sxya'

ãjatxki, kimwa kaahmeete'? Txãa yuwe's pta'sxsatx we'weçxa', Dxus librute na'jĩ'k: Yuwe ewsa's pta'sxna pa'jni' wala yuh ewsa', txãa pa'gatey weçxana fxi'zewa'ja'stxi pta'sxi' jĩ'k.

16 Txã'wētewa, jxukay yu' jxpa'gaçmeeta' ewte neeyũuwa'ja's pta'sxtewa. Txajĩik Isaiaswa na'wē we'we: Kwe'sx pta'sxni Dxus yuwe's çkimçxá' nwēese'jçxa kxtey yuuta'? jĩ'k.

17 Txã'wē Dxus yuwe pta'sxni's ew jiyunijũk ũusuh jxuka jxpa'gawa'j kaseje', aça' txãa pta'sxnisa yu' Kristo'sku we'we'.

18 Txã'wē pta'sxtewa meeçxa' çwēese'jmeewá'ntakx? Pejka wēse'jyuh ne'ta, txajĩik Dxus librutewa na'jĩna we'we':

Txãawe'sx pta'sxni's jxuka ya'wēse'kh.

Naa kiwete mtee mteewa jxuka pa'kh jĩ'k.

19 Makwe txã'wē yuutewa, Israelwe'sx yu' çjiyumeewá'ntakx? Txãawe'sxa' jiyuyuhne'ta, nawa jxpa'gameeta'. Txãawe'sxwa jiyumée yu' neeyũumeene'ta. Txajĩik Moisesa' Dxus we'weni's na'wē pta'sxi':

Adxa' vxite nasatx ew yũuçxa i'kwe'sxtxi kuh kaayaki'ji'nja,

Aça' ũusçxawa'ja's uyuune'kwe, nasa Dxusa's jiimeesa ũsta' txãawe'sxtxi adx luuçx vx-itpa'ga jĩ'k.

20 Isaiaswa Dxus we'weni's na'wēk ãate pta'sxi':

Adxa's pakwena pa'pçxumeeçxawa, uytxi.

Aça' adxa' ãate vxyaath paapējxna adxna pakwemeetewa jĩ'k.

21 Nawa Israelwe'sxtxi we'weçxa' na'jĩ'k Dxus librute:

Adxa' pa'yana nesthu yu' nasa wa'lsatx jĩ'k.

11

Israelwe'sx jxukate yu' vxitunimée

¹ Txã'wě pa'yatewa pasmeeyã'the', Dxusa' txajx txhitxhnisa Israelwe'sxtxi' ¿ahçema'k? sũju'th. Nawa weh yuhwa txã'wě yuume'. Txã'wě ahçemeeçxaíik adxa' Israel nasa, Abraham j'i', Benjamin nçxi'ktewe'sxthu nawa nwe'we. ² Dxusa' Israelwe'sxtxi nyafxiitey txhitxhçxa, ãçxpkaçx ahçemée iipe'ja'. I'kwe'sxa' jiine'kwe Dxus yuwe pta'sxsa Elias Dxus yakh puutx we'weni's. ³ Kxte' na'jĩ'k: Iidx yuwee pta'sxsatxi's ikhtxi sa' iidx altalnawa jxuka ivxiitutx, naasáa adx yuuçxáath neeyũu. Nawa adxnawa ikh wěje'íçxáatx jĩte', ⁴ Dxus pasçxa': Dxus ítximeesa Baal tasxte peejxũkwesamée siete mil nasa txhitxhçxa ji'pthu adx jĩi, aça' adxçxáath neeyũu sũhwa'j ji'phmeeg jĩk. ⁵ Naa ensuwa txã'wěyçxáa Israelwe'sx maaíi yu' Dxus txhitxhnisa ũsta' txajx peeygãanisa. ⁶ Dxusa' peeygãhçxa txhitxhku. Nawa ew yũuna fxi'zepa'ga txã'wě txhitxhme', naasáa peeygãhçxa yuuçxáak ewmeesatewa txhitxh. Aça' ew yũuna fxi'zepa'gaçxáa Dxusa' txhitxhwaça', Dxusa' peeygãhçxak txhitxh jĩya' ãjame'nja'w.

⁷ Israelwe'sxa' ewte neeyũuwa'ja's pakweçxawa txazíi yu' uymeeta', vxite yu' Dxus we'weni's nwěese'jmeeta' naa pa'ga. Naasáa Dxus txhitxhnisa maaíçxáatx ewte neeyũuwa'ja's uy. ⁸ Aça' txã'wě nwěese'jwa'jmeea's we'weçxak Dxus libroute na'jĩ':

Dxusa' txãawe'sxtxi' jiyuwa'jmeesak vxit.
 Aça' yafx ji'phçxawa uysamée na'wěçxáata',
 sa' thũ'wě ji'phçxawa wěse'jsamée
 na'wěçxáatx neeyũ.

Ãçxpkaçx txã'wěçxaçxáata' jĩ'k.

⁹ Txajĩk jxkaahsa Davxidwa na'wě we'we:

Txãawe'sx weçxana fxi'zeni' ewméeçxáa kase-
 hwaça' ewna,
 kastigãyni yuukahn.

¹⁰ Txãawe'sx yafxa' peekx suweetxna, uyya'
 ãjakahmén.

Txãawe'sxa' багаçxte yuhwa ew fxi'zeya'
 ãjameewaça' ewna jĩk.

Judiu ji'jmeesawa Dxus peeygãanisa

¹¹ Judiuwe'sxa' jxpubaçxa weteyã'jçxa',
 ¿peena yu' Dxus tasxte sx-
 awedwa'jsameetxmanx? Weh yuhwa txã'wě
 yuuwa'jsameeta'. Txã'wě judiuwe'sx wa'lpa'ga,
 judiu ji'jmée vxite nasatxku ewte neeyũuwa'ja's
 pta'sxni yuu, aça' vxite nasa Dxus yakh fxi'zeçte
 uyçxa', judiuwe'sxwa ki' sxawedxa' yaakxkahn.

¹² Judiuwe'sxa' ewte neeyũuwa'ja's jxpa'gaya'
 wa'lpa'ga, naa kiwete judiu ji'jmée vxite nasa
 jxukaysatxku selpí, txãasa judiuwe'sx jxukaysa
 Dxus tasxte ki' sxawednijũ' wejx wala selpiina.

¹³ Ãçxha' judiu ji'jmée vxite nasa jĩnisa
 i'kwe'sxtxi we'weya'wath, txãa pa'gatey adxa'
 judiu ji'jmée vxite nasatx Dxus yuwe's pta'sxya'
 kaahnisath, txãasa kxtey yuuya'wath. ¹⁴ Txã'wě
 yũute', i'kwe'sx ewte fxi'zeni's adx ji'j maafi
 yu' uyçxa', i'kwe'sx na'wěy ewte fxi'zewa'ja's
 pakweya' yaakiwáatxna sũju'th. ¹⁵ Judiuwe'sx

e'skhē nvxiitni yuupa'ga judiu ji'jmée vxite nasatx Dxus yakh weçxana fxi'zewa'ja's ji'phu. Txãasa judiuwe'sxa' Dxus tasxte ki' sxawedna pa'jçxa', uuniijũ ki' ĩtxi yuusáa na'wěsa yu-utxna. ¹⁶ Ũ'tasx kĭhwa nyafxtewe'sxa's Dxus jĭi peeste', neeyũusáawa jxukak Dxus bedekĩyni yu'. Fxtũu tasxa' Dxus jĭite', ku'tawa jxuka Dxus jĭiçxaçxáata'.

¹⁷ Judiuwe'sx maai' yu' uuhnisa oliwo fxtũu ku'ta's spē'thni na'wētx yuu. Aça' txãa spē'thnite yu' uuhnimeesa oliwo ku'ta's pũpxçxa kayweçe'jnisa na'wē i'kwe yuu, i'kwe'sx judiu ji'jmée vxite nasaçxawa. Txãasa i'kwe txãa fxtũu tasx na'wēy ewsa yuuna pa'j, oliwo fxtũu tasx ĩtxisate kayweçe'jni yuupa'ga. ¹⁸ Nawa txãa ku'ta spē'thnisate jxthaakwe ewspath sũhna yu' yaakxnu. Mpa'yajkx, txã'wěme' ku'ta pũpxnisa txã'wē fxtũu tasx ĩtxi yuuwa'ja's ũsu'çme'; fxtũu tasx kiwete iiwehçesak ku'ta pũpxnisa's ĩtxi yuuwa'ja's ũsu'.

¹⁹ Txã'wētewa, naa sũjuwá'ga: Txãa fxtũu ku'ta spē'thnite kayweçe'jya' adxa's peejne'ta yu', txãasane'ta ku'ta dxih yu'sa' spē'th sũjune'ga. ²⁰ Nawa idxa's kxtee kayweçe'jya' sũhçxa spē'thni yuumeeta'. Txãawe'sxa' Kristo's jxpa'gaya' wa'ltxi txãa pa'ga yuuçxáatx spē'thni yuu. Naapkaçxha' idxa' Kristo's wa'lmeeg jxpa'ga, txãa pa'ga yuuçxáag txãawe'sx ũsnite yu' idx pa'jya' aja. Txãa pa'ga iiwejçx yajkxmée, wala jxpa'yakx mfxi'ze. ²¹ Txã'wěme', Dxusa' judiu txajx txhitxhnisa yuhtxwa thēyméek kutxi'j na' idxa's yu' wejx txã'wē thēymée

kutxi'jina jxpa'yakxmeete'. ²² Ũus miiyajxk: Dxusa' wala yuh peeygãasa'. Nawa juuna'ya'wa txã'wëyçxá'. Nwëese'jsamée yakh yu', wala yuh juuna'sa'. Nawa idx yakh yu' wala yuh peeygãasa'. Txã'wëyã'the', txajx peeygãanijũ txutemée mfxi'ze. Txã'wë yuumeexxa', idxwa kutxi'jnisa yuune'ga. ²³ Nawa judiuwe'sxa' Dxusa's ki' pakweçxa yu', Dxus tasxtey thëymée ki' pa'jya' âjatxna, txãa pa'gatey Dxusa' thëymée jxpa'gawa'jsa'. ²⁴ Txã'wë idxa' judiu ji'jmée vxite nasag yu' na's yuhwa thëyméek ewstate yuutxa. Naapkaçxha' judiuwe'sx yu' Dxus txhitxhnisatx yu', açã' txãawe'sxtxi' wejx thëymée ki' jxpa'gana.

Israelwe'sx Dxus tasxte jxuka sxawedni

²⁵ Yakhthë'jwe'sx, Dxus ma'wë yũuya'waçxawa txãa yuuçxáak jii yu' txã'sna mjiyuwe açxha' iuwejçx yajxna fxi'zeya'mée: Judiuwe'sx maaí yu' txã'wë yuh Dxusa's nwëese'jmeeçxa txuteetx. Nawa judiu ji'jmée vxite nasa maazkuëesa Dxus tasxte pa'jwa'jsa ũstxna txãa jxuka âhpkaçxçxáatx judiuwe'sxa' Dxus tasxu txutee. ²⁶ Sa' vxite nasa jxuka Dxus tasxte pa'jna jxã'jaçpkaçxha', judiuwe'sxa' ki' jxukay nwe'wenisa yuutxna. Txã'wë yũuwa'ja's Dxus librute na'wëk pta'sxi':
Nwe'wesa' Jerusalen çxhabu pa'jçxa',
Jakobwe'sx ewmée yũuni's txudena.

²⁷ Txã'wë ewmée yũuni's txuhdeya'th puutx we'we txãawe'sx yakh jĩ'k.

²⁸ Txã'wë i'kwe'sx ewte neeyũuwa'ja's ji'phukahñçxáatx judiuwe'sxa' Dxusa's açesa

yuu. Nawa Dxusa' txãawe'sx yuutxi' açe'çme', txãa pa'gatey judiuwe'sxa' nyafxiitey Dxus txhitxhnisatx yu' naa pa'ga. ²⁹ Txãa pa'gatey Dxusa' ũsyã'jçxa', kusa'ja'çme', sa' pa'yayã'jçxa', wa'lu'çme'. ³⁰ Nyafxiia' i'kwe'sxa' Dxusa's jiimeeçxa nwẽese'jsamée i'kwe yu'. Nawa açxha' judiuwe'sx nwẽese'jeçmeete yu', i'kwe'sxa' Dxus peeygãanisa i'kwe yuu. ³¹ Nyafxiia' i'kwe'sxwa ma'wëkwe nwẽese'jsamée yu', txã'wëy judiuwe'sxwa açxha' nwẽese'jmée ũsta'. Nawa i'kwe'sxwa ma'wëkwe Dxus peeygãani's jxpa'ga, txã'wëy jxpa'gaya' íiçxáa txã'wë nwẽese'jmée ũsta'. ³² Txã'wë teeçxsaçxáa thaakwe ewspath sa' thaakwe peeygãanisath sũjkahmenku e'zíitx ja'daçxah nwẽese'jwa'jmeete vxit txãa na'wëçxaçxáa peeygãjxa'.

³³ Dxusa' ma'wë yũuwa'ja'swa seena' yuh zhiçxkwe ew pheu'jçxa ji'phune' txã'sna yajkxte', le'çxkweçxáa yuhwa ya'jiyu'çme', sa' pta'sxya'wa ya'ãja'çme'. ³⁴ Dxus ũus yaakxni's ¿kimçxá' jiyusa ũstxmanx? ¿Kimçxá' Dxusa's kaapiya'jsa ũstxmanx? ³⁵ Kĩjkĩhwa jxuka Dxus jĩiçxaçxáata' txajx nvxiitnisa, aça' ¿kimçxá' adx jĩ'sthu Dxusa's pees jĩwa'jsa ũstxmanx? ³⁶ Txãasa Dxusa' seena' yuh wala ewsa' bagaçxtewa nes yuuwa'jsa. Txã'sa' seena' yuh wala weçxawa'j ji'ptha'w.

12

Kwe'sx itxi fxi'zeni's Dxus kusete dukhni

¹ Adx yakhthē'jwe'sxtxi neewe'we'th: Dxusa' txakwe wala peeygāapa'ga, āçxha' i'kwe'sx ĩtxi fxi'zeni petx kakweyā'jçxa jxuka kĭh pkal yuhwa ji'phmēe txajx kuseteçxaçxāa ya'mdukhwe, Dxusa's yuuçxāa selpiina fxi'zeya'. Dxusa' txā'wē yūuni'sku jxthāasu' naa pa'ga kxtey yuuwa'j ji'ptha'w. ² Āçxhūyā'ja' naa kiwetewe'sx na'wēy yu' fxi'zenuwe, wejxwa i'kwe'sx fxi'zeni i'kwe'sx ũus yaakxni txāatx jxuka myu'pthehwe, kĭhtewa jxuka u'se yuuna pa'jya'. Txā'wē yūuçxa Dxus jxthāasni ewsa, txajx dxi'pte zhiçxkwe wēt fxi'zeniçxá's jiyune'kwe.

³ Dxusa' peeygāhçxa adxa's neewe'wek i'kwe'sxtxi yu'kxpejkahn, txāa pa'ga yu'kxpehwa'j ji'pthu: Adxçxáath thaakwe selpi' sūhna maa yuhwa iıwejçx yaakxwa'j ji'phmēe i'kwe, naasāa kĭhte selpiwa'jsa ne' Dxusa' nvxiht txā's yuuçxāana kxtey myūuwe, wala jxpa'yakxna. ⁴ Nasaa kakwe's miıyajkxwe: Txā' teeçxçxāaçxawa wala kuh jwed ji'pha', sa' fxiyfxiyçxahtx selpi', teeçx kakwetewe'sxçxāa we'sxçxawa. ⁵ Txā'wēy kwe'sxwa wala kuhçxawa, jxukaysa Kristo yuuçxá'stha'w selpi', jxukaysa kxteeçxah fxiyfxiyçxah selpiina.

⁶ Kwe'sx selpiiya' ājawa'ja's Dxusa' fxiyfxiyçxajk ũs, kĭhteçxah selpiiya' ājawa'jsa ne'tka'w yu' txāa yu'sa' jxukak ũs. Aça' txāatxi' wala jxpa'yakx iıxūwa'j ji'ptha'w. Meeçxawa Dxusa' txajx yuwe's pta'sxya' ājawa'ja's ũste', txajx kaajiyu'jniçxá's kxtey yuuwa'j ji'ptha'w. ⁷ Vxitesatx selpiina fxi'zewa'ja's ũste', txā'snawa kxtey yuuwa'j ji'ptha'w.

Sa' maawa kaapiya'jya' ājasa' txā'sa' kxtey yuuwa'ja'. ⁸ Nxuste fxi'zesatx puutx pu'çxya' ājasa' txā'wē yūuwa'ja's nvxiitwa'jme'. Peesya' yaakiççxa', kaasxwedu'juna sūhmée txā'wē peeswa'ja'. Dxus luuçxtxi jxpe'jsa', wala jxpa'yakx jxpe'jwa'ja'. Peejiina fxi'zesatx pu'çxsa', weçxana pu'çxwa'ja'.

Dxusa's jiisa' na'wē yūuwa'ja'

⁹ Teeçxsa na'wēçxah puutx ya'peeygāawa'ja's mji'phuwe, īsxiimée ūusuh jxuka yajkxna. Ewmeesa's nwēese'jmée ewsaçxá's kxtey myu-uwe. ¹⁰ Yakthē'ja's juuna' yuumée we-jxwa yakthē'ja' thaakwe walasa' sūhna puutx ya'mpeeygāhwe.

¹¹ Dxusa's selpiwa'ja'sçxáa ūusuh jxuka weçxana mpa'pçxuwe, wa'l yajkxmée.

¹² Ewte pa'jwa'ja's jii i'kwe txāa pa'ga weçxana mfxi'zewe. Nxuswa'j en pa'thewa txā'sa' ya-jkxmée, bagaçxtewa Dxus yakh yuuçxáa puutx we'wena mfxi'zewe.

¹³ Yakthē'jwe'sx peejiina fxi'zesawe'sxtxi' mpu'çxwe. I'kwe'sx yatte pa'jsatxwa wa'lmée mpa'gawe.

¹⁴ I'kwe'sxtxi ahçena pkxuusatx ka'tu yu' ewçxáa myūuwe, wejx yuuwa txāawe'sx pa'gate Dxusa's mneewe'wewe nwe'wekahn.

¹⁵ Weçxasáa yakh i'kwe'sxwa weçxaa mpu'çxwe, sa' nxussa yakh i'kwe'sxwa nxus mpu'çxwe.

¹⁶ Puutx ja'daçxah ewçxáa mfxi'zewe. Jxthaakwe jiith sūhçxa iiwejçx yajkxmée, āhmeekwesa na'wēyçxáa mfxi'zewe.

17 Makwe ewmée yūusaatewa, ka'tu yu' ewmée yuuwa'jme'. Ew yuuwa'jçxá's pa'pçxuwa'ja' jxukaysatx.

18 Jxukaysa yakh ew fxi'zewa'jçxá's mpaakwewe, i'kwe'sxtxi ma'wě wejx ew theguna txãa yu'sa' jxuka kxtey yuuna.

19 Yakhthē'jwe'sxtxi neewe'we'th i'kwe'sxtxi ewmée yūusaatx ka'tuwa ewmée yūuwa'ja's pakwena fxi'zekahmén. Txã'wě yūumée wejxwa idxna ewmée yūusa's kuçx yuunu, Dxus kastigāywa'jsa' naa pa'ga. Txajíik Dxus librutewa na'wě we'we': Ewmée yūusatx kastigāywa'jsa' adxthu. Adx jiine'tka jĩ'k.

20 Txã'wě ka'tu ewmée yūuwa'ja's yajxmée na'wě myūu: Idxna açesa ũ'wa'j ji'phmée wēena fxi'zeçte', ũ' mpuuç. Sa' yū'wēena fxi'zeçte', tudxwa'jwa mes. Idxa' txã'wě yūuçxa', kaythame'jene'ga jĩ'k. 21 Idxna ewmée yūusa's kaaknayu'jnu, wejxwa idx khuē'y meknay, ka'tu ew yūuçxa.

13

Naa kiwete jxkaahsawe'sx ma'wēsatsxwa nwēese'jwa'ja'

1 Naa kiwete jxkaahsawe'sx ma'wēsatsxwa jxuka nwēese'jna mfxi'zewe. Txãawe'sxa' jxuka Dxus nvxiitnisaçxaçxáata'. Maa yuhwa Dxus nvxiitnimeesa yu' meeta'. 2 Aça' maawa jxkaahsawe'sxtxi açesa' Dxus nvxiitnisatx açesa yuuna. Txã'wě açesa' yuuwesa kastigāywa'j yuuna. 3 Jxkaahsa ũsta' txãawe'sxa' ew yūuna fxi'zesatxi' kastigāywa'jsameeta'. Txãawe'sxa'

ewmée yūuna fxi'zesaçxáatx kastigāywa'jsata'. Aça' jxkaahsawe'sxtxi ũukhmée fxi'ze wēeçxa', txāawe'sx yu'kxpehntx jxuka nwēese'jna mfxi'zewe. Txā'wē yūusatxi' nwe'wewa'jsata'.
⁴ Txāa pa'gatey jxkaahsawe'sxa' Dxus nvxiitnisata', idxna pu'çxwa'jsa. Nawa idxa' ewmée yūuna fxi'zeçxa', ũukhwa'j ji'phune'ga, txāa pa'gatey jxkaahsawe'sxa' peekxçxāa ũsmeeta', txāawe'sxa' Dxus nvxiitnisata'. Txāa pa'ga ley ma'wē jxkaathe', kxtey yuutxna ewmée yūusa's kastigāyna.
⁵ Txāa pa'ga jxkaahsawe'sxtxi nwēese'jwa'ja', nawa kastigo's ũukhçxaçxāa nwēese'jmée, wejxwa Dxus jxkaahni's kxtey yuuçthu sūhna nwēese'jwa'ja'.
⁶ Txāawe'sxa' Dxus nvxiitnisayā'jçxa', txāawe'sx thegwa'j yu'sa' kīhnawa jxukatx kxtey yuuna fxi'ze'. Txāa pa'ga txāawe'sxtxi dukhwa'j vxyu's ũswa'j ji'phī'kwe.
⁷ Kīhçxah yuuwa'j ji'phçxawa, txā'sa' kxtey yuuwa'ja': vxyuu gobierno jī's yuulçxa', txā'snawa dukhwa'ja'. Sa' maaçxahtx nwēese'jwa'j ji'phçxawa, txāawe'sxtxi' nwēese'jwa'ja' wa'lmée.

⁸ Kīh yūuwa'ja'swa jxuka kxtey yuuwa'ja', kīh yuul yuhwa ji'phmée fxi'zeya', naasāa puutx ya'peeygāawa'ja's yuuçxāa багаçxtewa ji'phuna nes yuuwa'ja'. Txā'wē puutx ya'peeygāasa' Dxus jxkaahni leya's kxtey yuusaaçxa txā'wē yuuna.
⁹ Dxus leya' na'wēk jxkaaja': Ptam-sayā'ja' vxite yakh kazx pkal yuuwa'jme'. Nasa ikhwa'jme'. Pesweewa'jme'. Vxitetx īsxiina nuywe'wewa'jme'. Vxitee jīitx kusa'j wēena fxi'zewa'jme' jī'k. Aça' txāa jxkaahnitxi' jxuka kxtey nwēese'jya' na'wē yūuwa'ja': Vxitetxwa

mpeeygâh, idx ma'wêga ya'peeygâja' txã'wêy jî'k. ¹⁰ Txã'wê puutx ya'peeygâawa'ja's jî'phçxa', ewmêe yûuwa'j yu'sa' ya'yajkxmeena. Na'jî'th na': Peeygâanisa's jî'phte yuuçxáak Dxus jxkaahni leya's kîhte yuhwa peejxmêe jxuka kxtey ya'yu'.

¹¹ Txã'wê peeygâawa'ja's jxpa'yakxmeene'kwe aç'a' âçxha' jweeíçxáa utxaana u'jweça' kwe'sxtxi jxukate nwe'wewa'j ena', txãa pa'ga jxpa'yakx meswe. ¹² Txã'wê yûuwa'j ena' pa'ja' jxthëeyuumeena, txãa pa'ga çxhi'dxte fxi'zeni's nvxihtçxa, eena'te fxi'zewa'ja's jxpa'yakxwa'j jî'ptha'w. ¹³ Na'wê yûumêe: ewmêe yûuwa'jçxá's yajkxna, kazx pkal yuuna, puutx yahçena puutx puiina, beka yat-su tûuna susna txã'wê yûumêe, ewçxáa yûuna zhiçxkwe fxi'zewa'j jî'ptha'w. ¹⁴ Naasáa Jesukristo ma'wê jxkaathe', txã's yuuçxáa jxuka nwêese'jwa'j jî'ptha'w, peekx ũus yaakxni ewmeesa yu's nwêese'jmêe.

14

Yakhthê'ja's açewe'wewa'jme'

¹ Kristo kaapiya'jni's açxamêe ew jiisa yakhthê'ja's wa'lmêe mpa'gawe, txajx jxpubanisu açewe'wemêe. ² Miiyajkxwe wakx vxiteya' naa sÿju'tx: Ũ'nisa yu'sa' kîhnawa jxuka ũ'wa'ja' sÿju'tx. Naapkaçxha' Kristo kaapiya'jni's açxamêe ew jiisa' ũ'wa'ja's txhitxhçxa ũ'wa'ja' sÿju'tx. ³ Aç'a' maa sÿhmêe kîhnawa jxuka ũ'sa' txhitxhçxaçxáa ũ'sa's açewe'wewa'jme'. Txã'wêy txhitxhçxaçxáa

ũ'sawa kuçx açewe'wewa'jme' kîhnawa jxuka ũ'sa's. Ma'wě ũ'saçxawa txãawe'sxa' Dxus luuçxta'. ⁴ Idxa' ¿kimçxaga iidx jxpe'jnimeetx açewe'we'? Txã' ew ma'k yuu ewmée ma'k yuu nawa txã'sa' patron jxpe'jsa jiina, txãa pa'gatey jxpe'jsa' ma'wě ew fxi'zewa'ja'swa txãa pu'çxwa'jsa'.

⁵ Vxiteya' naa sũju'tx: Fxiesta en yuutxi' jxuka ki'swa'ja' sũju'tx. Naapkaçxha' vxite' maa fxiesta yuutxi' ki'swa'jme' sũju'tx. Ma'wě yaakxsaçxawa teeçxsa na'wěçxah i'kwe'sx ũuste ew ũusutheniçxá's nwěese'jna mfxi'zewe kuçx açewe'wemée. ⁶ Txãa pa'gatey fxiesta entxi jxuka ki'ssawa, Dxusa's weçxanak ki'su', açá' fxiesta entxi jxukamée ki'ssawa Dxusa's íiçxáak weçxana fxi'ze'. Txã'wěy kîhnawa jxuka ũ'sawa Dxusa's weçxanak ũ'we', açá' kîh iiyuutxi' ũ'sameewa Dxusa's íiçxáak weçxá'. Jxukay Dxusa'sçxaçxáatx weçxá'.

⁷ Txãa pa'gatey kwe'sx itxi fxi'zeni kwe'sx uuwa'j ma'k yuu nawa txã' kwe'sx jji meeta', açá' peekx ma'wěwa yũuna fxi'ze'nja sũhwa'j ji'phmeetha'w.

⁸ Na'wě itxi fxi'ze'tha'w txã' Kristo jĩ', sa' uumtha'w nawa Kristo jxthãasniçxá'stha'w kxtey yu', txãasa itxi fxi'zeni ma'k yuu uu en ma'k yuu nawa Kristo jiiçxaçxáata'.

⁹ Txã'wě Kristo' itxisawe'sx ma'tx yuu uusaawe'sx ma'tx yuu nawa jxukaysate namu yuuya'íiçxáak uuniijũwa ki' itxi yuu.

¹⁰ Namu' Kristo', açá' idxa' namumeeçxa' ¿kĩjxa'ga iidx yakthē'ja's ewmeesa' jĩna açewe'we'? Dxus tasxte kuutxa'jni yuuwa'jsatha'w, açá' Dxus yuuçxáa

ma'wē yuusaatewa we'wewa'j ji'pha'. ¹¹ Txajji Dxus tasxte kuutxa'jni yuuwa'ja's Dxus librute na'wē fxi'jni':

Adxa' Dxus itxisa isath we'we',
Majūwe'sxwa jxuka adx tasxteçxaçxáa pee-
jxūkwena pa'jçxa,

Dxus yuh yu'ga jīna weçxaatxna.

¹² Txā'wē yūuçxa teeçxsa na'wēçxah Dxus tasxte paswa'j ji'phu'nja'w ma'wē yūusaaçxawa.

Yakhthē'ja's kaypuba'jwa'jme'

¹³ Txāa pa'ga āçxhūyā'ja' txā'wē ewmeeg yu' jīna puutx açewe'wena fxi'zewa'j ji'phmeetha'w. Txā'wē yūumée wejxwa ewçxáa yūuna mpu'çx, yakthē'j jxpubakahmén. ¹⁴ Adxa' jiith Kristo Jesus yakh fxi'zesa yakha', kīh ũ'yuhwa ewmeesa yu' meea'. Nawa txā'wē ewmeena sūhna yaakxsa yakh yu' ewmée yuhna. ¹⁵ Nawa iidx yakthē'j dxi'pte jxpa'yakxmée kīhnawa ũ'pa'gaçxáa txāa yakthē'ja' jxpubawáana aça' idx yuuwesa yuune'ga peeygāasamée. Kristo uuçxa nwe'wenisawe'stxxi' idxa' kaypuba'jnu iidx ũ'nisa yakh. ¹⁶ Idx yakh yu' ewsaçxawa, vxitesa yakh yu' ewmeesa wáa yuuna aça' txā'wē yūuweçxsa yuutxi' wala mpa'yajkx. ¹⁷ Txāa pa'gatey Dxus yakh fxi'zewa'ja' ũ'nisatx jxpa'yakxçxa txā'wē Dxus yakh ya'fxi'zeçme', naasáa Dxus Espiritu pu'çxte yuuçxáak Dxus yakh wēt weçxana jxpubamée fxi'zewa'ja's ya'ji'phu'. ¹⁸ Txā'wē vxitetx kaypuba'jmée jxpa'yakx Kristo's selpiite' Dxusa' weçxa'k aça' nasawa weçxa'tx txā'wē yūute'.

19 Txã'wẽ puutx ew yũuna puimée fxi'zewa'jçxá's pakwewa'j ji'ptha'w, Dxus yakh jweeíçxáa çxhãçxha fxi'zewa'ja's puutx ya'pu'çxna. 20 Û'nisa' jxuka ewsata'. Nawa vxitesatx kaypuba'jwa'ja's ù'teçxáa ewme'. Txãa pa'ga Dxus yakh fxi'zesa yakhthê'jwe'sxtxi' kaypuba'jnu iidx ù'ni yakh. 21 Txã'wẽ peekx yakhthê'ja's kaypuba'jwa'j yu'sa' ù'nimée wejx ewa', çxiçx, vxino, kîhwa kaypuba'jwa'j yu'sa' jxuka. 22 Idx yakh yu' kîh ù'wa jxuka ewsatewa jiiçxa', iidx ù'usteçxáa txãa sũhna mfxi'ze Dxus dxi'pte. Ewmeena sũhwa'ja's ù'usteçxáa yuhwa yaakxsamée yakh yu', ew yuja'. 23 Nawa ewmeewáana sũhna kuh jwed yajkxna ù'sa yakha', ewmée yuja'. Txãa pa'gatey ewmeewáanax sũhwa'ja's ji'phçxa nwēese'jmeete', txãa yu' pkal yuja'.

15

Vxitesa yakh ewçxáa yũuna fxi'zewa'ja'

1 Dxus yakh çxhãçxhayã'j fxi'zesa' peekçxáa wēt fxi'zewa'ja's pakwemée, pu'çxwa'j ji'ptha'w Dxus yakh fxi'zewa'ja's açxamée ew jiisatx. 2 Kwe'sxa' teeçxsa na'wēçxah vxite nasatx pu'çxna wēt kaafxi'ze'jwa'j ji'ptha'w ewçxáa yũuna, txãawe'sxa' Dxus yakh jweeíçxáa çxhãçxha fxi'zeya' ájakahn. 3 Txãa pa'gatey Kristo txakwe jxtuhthesa yuhçxawa, peekçxáa wēt fxi'zewa'j yu'sa' pakwemée, wejxwa vxitetx wēesxuni's txáak jxpa'ga. Txã'sna we'weçxak Dxus librute na'jî': Idxna wēesxuni's adxthu jxpa'ga jî'k. 4 Dxus librute fxi'jni ùsta' txã'

kwe'sxtxi kçxhãaçxha'jwa'jsata', nxuswa'j en ma'wësa pa'thewa nxusmëe çxhãçxha yajkxna fxi'zeya' piyakahn. ⁵ Nxuswa'j en pa'thewa çxhãçxha fxi'zewa'ja's Dxusku üsu' na' txãái pu'çxhina puutx ewçxáa yüuna Kristo Jesus na'wëy fxi'zekahn, ⁶ kxah kxteeçxah jxukaysa kwe'sxtxi jxpe'jsa Jesukristo Tata yuuçxá's tuuthe'jene'kwe.

Judiu ji'jmée vxite nasatx Dxus yuwe's pta'sxni

⁷ Kristowa ma'wëga i'kwe'sxtxi jxpa'ga txã'wëy i'kwe'sxwa wa'lmée mpa'gawe maa yakthē'jtxwa, Dxus weçxakahn. ⁸ Miiyajkxwe: Dxusa' kwe'sx yaçgawe'sx yakh puutx we'wek Kristo kiiwa'ja's, aç'a' txãa puutx we'weni kxtey yuukahnku Kristo' kîh judiuwe'sxtxi selpiiya'. ⁹ Sa' judiu ji'jmée vxite nasawa Dxusa's jxpa'gaçxa weçxana tuuthe'khanu Kristo' kîh. Txã'sna we'weçxak Dxus librute na'jî':

Txã'wë ew yüupa'ga txãawe'sx ksxavxyte idxa's weçxana memna tuuthe'je'nja jî'k.

¹⁰ Sa' vxite ajkhëwa na'wëk we'we':

Judiu ji'jmée vxite nasaçxawa judiuwe'sx yakh ja'daçxah wëtwët miiyajkxwe jî'k.

¹¹ Sa' vxite ajkhëwa pta'sxi' iicxáak:

Judiu ji'jmée vxite nasa jxukaysawe'sx Dxusa's weçxana mtuuthe'jwe,

Dxusa' seena' yuh walasa' jîna nasa jxukaytxi pta'sxna.

¹² Txajüçxáak Isaiaswa na'jîna fxi'j:

Jesé ji'j teeçx kasejena, judiu ji'jmée vxite nasatx jxuka yamuya'.

Aç'a' txãawe'sxa' nwe'wenisa yuutxna jî'k.

¹³ Kwe'sxtxi nwe'wesa Dxusa' i'kwe'sx ũuste wēt̄wēt weçxana fxi'zewa'ja's ũsuna txã'sna jxpa'gasatxi's, kxah Dxus Espiritu pu'çxte', Dxus nwe'wenisatha'w yuu sũhna weçxana fxi'zene'kwe.

¹⁴ Adx yakthē'jwe'sx, adxa' ew jiith i'kwe'sxa' ew yũuwa'j yuuçxá's ne'kwe ũuste ji'ph fxi'ze', ma'wē yũuwa'ja'swa sxiigmée. Txãasa ne'kwe teeçxsa na'wēçxah puutx ew ya'yu'kxpehna fxi'ze' sũju'th. ¹⁵ I'kwe'sxa' txã'wēyã'j sxiigmée fxi'zesa ne'kwe, nawa adxwa fxii yu'kxpehna fxi'jaçthu Dxus yakh wejx ew fxi'zewa'ja's kaa'jiyu'jna. ¹⁶ Txã'wē yũuwa'ja's Dxusku adxa's neewe'weçxa nvxiht, judiu ji'jmée vxite nasatx Jesukristo kaapiya'jni's pta'sxkahn. Txãa Jesukristo kaapiya'jnisaíi Dxus yuwe ewte nvxi-itwa'jsa' txã'snath adxa' pta'sxi', judiu ji'jmée vxite nasaçxawa Dxus Espiritu pu'çxte', Dxusa's jiyuçxa ewte neeyũukahn.

¹⁷ Txãasath adx ũuste wēt̄wēt yaaki', Jesukristo kaapiya'jni's pta'sxna Dxusa's selpi'th sũhna. ¹⁸ Nawa txã'wē yũuwa'ja's Kristok adxa's pu'çx judiu ji'jmée vxite nasaçxawa Dxusa's nwēese'khan, txãawe'sx ew jiyukahn yuwejuwa pta'sxna, kim yuhwa ājanimeesatx āatewa kaavxya'ja'jnik yuu Dxus Espiritu pu'çxte. ¹⁹ Txã'wē yũunath Kristo yuwe ewte nvxiitwa'jsa's mtee mteewa pta'sxna jxã'j, Jerusalente takhçxa Ilíriko kiwete pa'phkaçx. ²⁰ Txã'wē vxite pta'sxnisu yu' pekũjxa'meeth yajkx, wejxwa bagaçxteçxáa yuhwa Kristo yase's kxsusnimeesuth txajx yuwe ewsa's pta'sxya' yajkx, Dxus libroute na'jĩ'k txãa kxtey yuukahn:

21 Txãawe'sxa' bagaçxteçxáa yuhwa
 Dxus yuwe's pta'sxni meesaçxawa,
 wêse'jetxna,
 Sa' jiyutxna, bagaçxteçxáa yuhwa
 jiimeesaçxawa jĩ'k.

Pablo Roma çxhabna u'jya' yaakxni

22 Txã'wê Dxus yuwe's kaapiya'jna u'juçxath
 i'kwe'sx tasxna yujxa' yu' tudu'çmée, maz
 uswa yujxa' yajkxçxawa. ²³⁻²⁴ Nawa açxha'
 naa ja'dasu pekühna jxã'th na' Espanxa
 kiwen u'jweççxa', i'kwe'sx tasxsuwa iipa'j
 uykhëu'nja txã'wê yũuwa'ja's nyafxiiith yaakxni
 ji'phu'. Aça' i'kwe'sx yakh pkhaakhena üçxa
 Espanxa kiwen u'jweçte', pu'çxhine'kwe sũju'th.
²⁵ Nawa açxhíi yu' Jerusalenna u'jweçthu
 kxtee yakhthê'jwe'sxtxi kĩhçxáawa pu'çxwa'j
 jxũna. ²⁶ Jerusalente yakhthê'jwe'sx kĩhwa
 ji'phmeesa üsta' txãawe'sxtxi pu'çxya' jĩçxa
 vxyuu pkhakhtxi Macedonia vxite' Akaya
 kiwesuwe'sx txã'sna jxũna u'jweçthu. ²⁷ Txã'wê
 pu'çxte ewna sũhwa'ja's ji'phutx, txãa pa'gatey
 isa ew yajkxte yu' Macedoniasuwe'sxa' yuultxi
 yu', txã'wê judiu ji'jwe'sxa' Dxus yuwe ewsa's
 jxtxuhdetx judiu ji'jmée vxite nasatxwa.
 Txãa pa'gatx Dxus yuwe ewsa's kwe'sxtxi
 pta'sxpaga ka'tuwa kaasxwedu'jwa'j ji'ptha'w
 jĩçxa txãawe'sx ji'phunisa yakh pu'çxya' yajkx.
²⁸ Aça' txã'wê Jerusalente pa'jçxa' pkhakhni
 vxyu's txãawe'sxtxi dukhçxa', Espanxa kiwen
 u'jya'wath, txãasa i'kwe'sx tasxsuwa dudte
 ne'ka'nja. ²⁹ Adx i'kwe'sx tasxte pa'the', i'kwe'sxa'

jweeíçxáa Kristo yakh çxhãçxha fxi'zene'kwe sũju'th.

³⁰ Yakhthê'jwe'sx, i'kwe'sxtxith neewe'we': peeygãawa'ja's Dxus Espiritu ũste ji'phi'kwe, txãasa adxa's peeygãhçxa Jesukristo's pi'kxçxa adx pa'gate Dxus yakh puutx we'wekahn.

³¹ Judea kiwete açesa ũsta' txãawe'sx adxna kĩhwa ewmée yũukahmén Dxusa's mpi'kxwe, sa' Jerusamente yakhthê'jwe'sxtxi pu'çxwa'j jxũna u'jweçthu txã'snawa weçxana jxpa'gakahn,

³² kxah Dxus pu'çxte', ewçxáa ki' sxawedçxa i'kwe'sx yakh weçxana ũswa'ja's ji'phu'nja.

³³ Dxusa' i'kwe'sx jxukaysa yakh pi'kxna nes yuuna, ewçxáa kaafxi'ze'jna.

16

Nasa iisa yuwe weçxaa kaahni

¹ Kwe'sx npe'sx Fxebe pa'the', txã'sa' wa'lmée jxpa'gakahn neewe'weçthu i'kwe'sxtxi, txã' Cenkrea çxhabte pkhaakhesatx selpiisa'. ² Txãa pa'gatey Dxusa's jiiyã'jsa' ma'wě yũuwa'ja'swa jii i'kwe na' txã'wěçxáa yũuna mpa'gawe, Kristo's selpiisa' naa pa'ga kwe'sx npe'sxna sũhna. Sa' txãa kĩh peejini'swa mpu'çxwe, txãa pa'gatey txã' maatxwa wala pu'çxsa' txãasaíik adxnawa pu'çx.

³ Priscila vxite' Akila txãawe'sxtxi yuwe mweeçxawe, Kristo Jesusna adx selpiiçte', txãawe'sxa' kxtee adx yakh mjii pu'çxsatx yu'. ⁴ Txãasaíitx txãawe'sxa' u'dxih adxna nwe'wena. Txã'wě ew yũupa'gath adxa' txãawe'sxtxi' wala weçxá'. Nawa adxçxáa

txã'wẽ weçxa'çméeth, judiu ji'jmée vxite nasawa weçxa'tx Dxusa's jiisawe'sx. ⁵ Priscila vxite' Akila txãawe'sx yatte pkhaakhesa yakthē'jwe'sxtxiwa yuwe mweeçxawe. Sa' adx namiku Epeneto'swa mweeçxawe. Txãak nyafxçxah Akaya kiwete Kristo's ũuste jxpa'gasa yu'. ⁶ Maria'swa yuwe mweeçxawe, txã' nakwe wala mjïik i'kwe'sx ksxavxyte. ⁷ Adx ji'j Adróniko vxite' Junias txãawe'sxtxiwa yuwe mweeçxawe. Txãawe'sxa' adx yakh karcelte ũssata', sa' Dxus yuwe's pta'sxya' kaahnisawe'sxtxi yu', thaakwe jiyunisa. Sa' txãawe'sxa' Kristo's jiisayã'jtx yu' Kristo's adx jiyumeyna.

⁸ Kristo's jiisa adx namiku Ampliasnawa yuwe mweeçxawe. ⁹ Kwe'sx na'wëy Kristo Jesusa's selpiina fxi'zesa Urbano'swa yuwe mweeçxawe, vxite' adx namiku Estakisnawa txã'wëy. ¹⁰ Apelesnawa yuwe mweeçxawe, txã'sa' makwe nxuswa'j en pa'thewa, Kristo yakh txutemeek fxi'zesa yu'. Sa' Aristobulowe'sxtxiwa txã'wëy yuwe mweeçxawe. ¹¹ Adx ji'j Herodiana'swa yuwe mweeçxawe, vxite' Narciso ji'jwe'sx Kristo's jiisatx yuwe mweeçxawe. ¹² Trifxena vxite' Trifxosawe'sxtxi yuwe mweeçxawe, txãawe'sxa' Kristo's selpisaatx yu'. Sa' kwe'sx npe'sx Persidanawa yuwe mweeçxawe, txãawa wala mjïisa yu'k Kristo's selpiina. ¹³ Rufxusnawa yuwe mweeçxawe, txã' wala jiyunisa yu'k Kristo's nwëese'jsa' jïni, sa' txajx nji'ja'swa yuwe mweeçxawe, txã' adxna jxpe'jsa mama na'wësak yu'. ¹⁴ Vxite' naawe'sxtxi yuwe mweeçxawe: Asinkrito, Fxlegonte, Hermas,

Patrobas, Hermes, vxite' yakhthē'jwe'sx txāawe'sx yakh ūssayā'jçxa. ¹⁵ Vxite' naatx yuwe mweeçxawe: Fxilólogo, Julia, Olimpás, Nereo vxite' txajx npe'sxna. Sa' txāawe'sx yakh ūssa Kristo's jiisa yuutxi' jxuka mweeçxawe.

¹⁶ Teeçxsa na'wēçxah ūuste wala wēt ya-jkxna puutx yuwe mweeçxawe. Sa' Kristo's nwēese'jsa mteewa pkhaakhesa yu' jxukaysatx yuwe weçxaakaja'.

¹⁷ Yakhthē'jwe'sxtxi neewe'we'th, i'kwe'sxa' wala mpa'yajkxwe na'wē ew fxi'zewaja's piya i'kwe txāajū kaypuba'jna kaapui'jna fxi'zesatx. Txā'wē yūusawe'sx yakha' mtxuteewe.

¹⁸ Txā'wēme', txāawe'sxa' Jesukristo's selpiisameeta'. Txāawe'sx ewmēe yaakxnīçxá'stxi kxtey yuuna fxi'ze', sa' nasa açxamée ew jiisa yuutxi'sa' kaypuba'ja'tx wala zhiçxkweçxáa we'weçxa. ¹⁹ Kristo kaapiya'jni's i'kwe'sx ūusuh jxuka nwēese'jni's jxukaysa jiita', txāa pa'gath adxa' weçxá'. Sa' ewmeesa yu's nwēese'jmée wejxwa ewsaçxá's nwēese'jna ūskahnthu neewe'we'. ²⁰ Aça' kīhtewa jxuka ew kaafxi'ze'jsa Dxusa' i'kwe'sxtxi pu'çxhina eçxthē'j knaykahmén. Aça' i'kwe'sxa' Jesukristo yakhçxáa mfxi'zewe.

²¹ Adx yakh mjīi pu'çxsa Timoteowa yuwe weçxaakaja'k, vxite' Lucio, Jasón, Sosípater adx ji'jwe'sx.

²² Naa karta's fxi'phu'çxsa Tercio adxwa yuwe weçxaakaja'th Dxus yakh fxi'zesatx. ²³ Sa' Dxus luuçx pkhaakhewa'j yat pki'jsa Gayowa yuwe weçxaakaja'k, adxa's paadee yat pki'jsa. Vxite' Erastowa yuwe weçxaakaja'k, gobierno vxyu's

jxaawsa. Txã'wěy kwe'sx yakhthē'j Kuarto yaas-
esawa weçxaakaja'k.

²⁴ Kwe'sxtxi jxpe'jsa Jesukristo pu'çxhina
i'kwe'sx jxukaysatx багаçxtewa.

Dxusa's yuuçxáa weçxani

²⁵ ãçha' Dxus kusete nvxiituçthu txã'
i'kwe'sxtxi jweeíçxáa çhãçxha kaafxí'ze'jena,
Jesukristo kaapiya'jni's ma'wětka pta'sx txã'sa'
kxtey yuuna. Kwe'sx ewte neeyũuwa'ja's naa
kiwemeeteyku Dxusa' pheu'jçxa ji'phu', ²⁶ nawa
txã'sa' jũ'nasuçxáak kaajiyu'jni yuu, Dxus yuwe
pta'sxsawe'sxtxi kaafxí'ja'jçxa. Txã'sna ãçha'
maa kiwetewa jxuka pta'sxni yuuça', maawa
Kristo's ũuste jxpa'gaçxa nwēese'khan. Txãa
pa'ga Dxusa's wala weçxaawa'j ji'ptha'w.

²⁷ Dxus yuuçxáa ma'wě yũuwa'ja'swa jxuka
jiisa'. Txãa pa'ga txã's yuuçxáa багаçxtewa
weçxana nes yuuwa'ja', kwe'sxtxi nwe'wesa Je-
sukristo ew yũupa'ga.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

06da09f4-8d0f-5001-ae8c-0e6aa0131ffd